

大乘起信論疏

鐵雲



大乘起信論疏序

西太原寺沙門法藏述

夫真心寥廓。絕言象於筌筥。冲漠希夷。忘境智於能所。非生非滅。四象之所不遷。無去無來。三際莫之能易。但以無住爲性。隨派分歧。逐迷悟而升沈。任因緣而起滅。雖復繁興鼓躍。未始動於心源。靜謐虛凝。未嘗乖於業果。故使不變性而緣起。染淨恒殊。不捨緣而卽真。凡聖致一。其猶波無異溼之動。故卽水以辨於波。水無異動之溼。故卽波以明於水。是以動靜交徹。眞俗雙融。生死涅槃。夷齊同貫。但以如來在世。根

疏序

一

契易調。一稟尊言。無不懸契。大師沒後。異執紛綸。或趣邪途。或奔小徑。遂使宅中寶藏。匿濟乏於孤窮。衣內明珠。弗解貧於傭作。加以大乘深旨。沈貝葉而不尋。羣有盲徒。馳異路而莫返。爰有大士。厥號馬鳴。慨此頽綱。悼斯淪溺。將欲啟深經之妙旨。再曜昏衢。斥邪見之顛眸。令歸正趣。使還源者可卽。反本非遙。造廣論於當時。遐益羣品。旣文多義邈。非淺識所闕。悲末葉之沈淪。又造斯論。可謂義豐文約。解行俱兼。中下之流。因茲悟入者矣。

大乘起信論疏卷首

馬鳴菩薩造論

陳真諦三藏譯

唐西京太原寺沙門法藏造疏

終南草堂寺沙門宗密錄注

明浙江雲棲寺沙門祿宏重次

後學皖南楊文會修定科文并錄法數

卷首

一

大乘起信論疏卷上

○將解此論文分二章。初懸敍義門。隨文注解。

○初懸敍義門。六。初教起因緣。二諸藏所攝。三教義分齊。四教所被機。五能詮教體。六所詮宗趣。

○一。辨教起因緣。有十徵釋。以顯十因。一。依何智。謂依論主洞契心源之智。隨機巧妙之辯。二。示何法。謂一心二門三大四信五行等法。三。云何示。謂以巧便開一味大乘作法義二種。分一心法。復作二門。析一義理。復爲三大。由此善巧而得開示。四。以何顯。謂妙音善字。譬喻宗因。能令義理明了顯現。

起信論疏卷上

五。依何本。謂依佛聖言。及正道理。定量爲本。六。藉何力。謂歸命三寶。請加承力。七。爲何義。謂助佛揚化。摧邪顯正。護持遺法。令久住世。報如來恩。八。以何緣。謂令眾生離一切苦。得究竟樂。九。由何起。謂由菩薩大悲愍物迷謬。十。機何益。謂令生信。得聞思修慧。證入因滿。

○二。約諸藏所攝。三藏之中。對法藏攝。二藏之中。菩薩藏攝。

○三。顯教義分齊。二。一。約教詮法通局顯分齊。謂以義分教。教類有五。一。小乘教。但說我空。縱少說法。

空。亦不明顯。但依六識三毒。建立染淨根本。未盡法源。故多諍論。二。大乘始教。亦名分教。於中但說諸法皆空。未盡大乘法理。故名爲始。但說一切法相。有不成佛。故名爲分。三。終教。亦名實教。說如來藏。隨緣成阿賴耶識。緣起無性。一切皆如。定性二乘。無性闡提。悉當成佛。方盡大乘至極之說。故名爲終。以稱實理。故名爲實。四。頓教。總不說法相。唯辨真性。亦無八識差別之相。訶教勸離。毀相泯心。但一念不生。即名爲佛。不依地位漸次。故說爲頓。五。圓教。所說唯是法界。性海圓融。緣起無礙。相即

起信論疏卷上

二

相入。帝網重重。主伴無盡。若於五中顯此論之分齊。正唯終教。亦兼於頓。若將此論。與五教互相攝者。五唯後三攝此。此唯攝五前四。二。約法生起本末顯分齊。謂依此論所詮染法。從本起末。畧有五重。以對諸宗。顯其分齊。五重者。初唯一心爲本源。即華嚴經一眞法界。然華嚴所宗。雖四法界。而彼疏云。統唯一眞法界。謂寂寥虛曠。沖深包博。總該萬有。即是一心。正當此門。體絕有無。相非生滅。莫窮其始。寧見中邊。眞如門。迷之則生死無窮。解之則廓爾大悟。生滅門。二。依一心開二門。一者心眞如門。

卽頓教分齊也。始教中空義。亦是密說此門。二者心生滅門。謂依如來藏有生滅心。所謂不生不滅與生滅和合。非一非異。名爲阿黎耶識。卽終教分齊也。以始教相宗。不知佛說如來藏以爲阿賴耶。故非彼分。三。依後門明二義。一者覺義。前眞如門。不變。此門覺義。但顯染中淨相。二者不覺義。前生及反流還源。並非起末倫次。四。依後義生三細。一業相。賴耶自是生起次也。二轉相。見分。相分。卽唯識宗齊此業相。以爲諸法生起之本。以彼宗未明此等與眞如同以一心爲源。故說眞如無知無覺。凝然不變。不許隨緣。但說

起信論疏卷上

三

八識生滅。縱轉成四智。亦唯是有爲。不得卽理。故詮法分齊。唯齊業識。五依最後生六麤。一智分別境界。二生苦樂受。三著苦樂。四計名字。五造業。六受報。二乘所明諸法。唯齊第三。人乘天乘。唯齊第五。若取血脉相承。一向躡前起後。以明生起。略有八重。一以一心爲本。二不覺一心成業相。三能見相。四境界相。五分別相續。法執。人執。六取著計名。七造業。八受報。

○四明教所被機。一切眾生。皆有佛性。無非所被。不同法相宗。唯被菩薩性及不定性。然一切眾生。三

聚統收。此論正唯爲不定聚故。下文云。依未人正定聚眾生。故說修行信心。兼爲邪定作遠因緣。兼爲正定令增妙行。準此義例。則五性中。正被菩薩性及不定性。令修信心。兼爲餘性作遠因緣。又因緣分中。別明所被。至文當辨。

○五能詮教體。略作四門。一。隨相門。於中或唯名句文。謂能詮諸法。自性差別。二所依故。或唯音聲。離聲無別名等。攝假從實故。或假實雙取。四俱爲體。又徧於六塵。一切所知境界。總有生解之義。悉爲教體。二。唯識門。謂說者淨識所現文義。爲增上緣。

起信論疏卷上

四

令聞者識上文義相現故。下文云。若離自心念。則無一切境界之相。是故一切聲名句文。皆是自心之所顯現。三。歸性門。此識無體。唯是眞如故。下文云。是故一切法。從本以來。離言說相。乃至唯是一心故名眞如。四。無礙門。謂於前三門。心境理事。同一緣起。混融無礙。交徹相攝。以爲教體。以一心法有二門故。二皆各攝一切法故。

○六所詮宗趣。當部所崇曰宗。宗之所歸曰趣。二。初總辨諸宗。一切經論。通大小乘。宗途有五。一隨相法執宗。卽小乘諸師。依阿含等經所立。以造諸部

小乘等論。二真空無相宗。卽龍樹提婆。依般若等經所立。以造中觀等論。三唯識法相宗。卽無著天親。依解深密等經所立。以造唯識等論。四如來藏緣起宗。卽馬鳴堅慧。依楞伽等經所立。以造起信等論。五圓融具德宗。謂事事無礙。主伴具足。重重無盡。卽華嚴經。今此論宗。當其第四門也。然此五宗。對前五教。互有寬隘。教則一經容有多教。宗則一宗容具多經。隨何經中。皆此宗故。後唯明此論。又有總別。總以一心法義爲宗。信行得果爲趣。別者有五對。一教義對。教說爲宗。義意爲趣。如下文。

起信論疏卷上

五

令捨言取意等。二理事對。舉事爲宗。顯理爲趣。如從生滅門入真如門等。三境行對。以真俗境爲宗。止觀行爲趣。四證信對。以成信不退爲宗。登地入證爲趣。五因果對。以因爲宗。克果爲趣。此五是從前起後。漸漸相由矣。

○二隨文注解。二。初解名題。二解文義。

○初解名題

大乘起信論

大者。當體爲目。包含爲義。乘者。就喻爲稱。運載爲功。大乘卽所信之境。起信卽能信之心。心境合目。

也。此卽大乘之起信。又亦起大乘之信。又大者就義。謂體相用。乘者就人。謂菩薩等。又依雜集論。由與七種大性相應。故名大乘。一境。二行。三智。四精進。五方便。善巧。六證得。七業。起謂發起。以有本覺內熏爲因。善友聞熏爲緣。於此勝境。發希有信。能令心淨。如水清珠。何故但明信而不言餘行。以是行本故。論爲初機。故下文云。自信已性。知心妄動。修遠離法。又華嚴云。信爲道源功德母等。論者建立決了可軌文言。判說甚深法相道理。依決判義名之爲論。又論者集法議論也。謂假立賓主。往

起信論疏卷上

六

復徵析。論量正理。故名爲論。

馬鳴菩薩造

名馬鳴者。此菩薩初生之時。感動諸馬。悲鳴不已。又善能撫琴。以宣法音。諸馬聞之。咸悉悲鳴。中印土月氏國王。將欲試驗。以行正法。取馬七匹。絕其水草。已經六日。至第七日。宣告集眾。王躬禮請升座說法。令於眾中。以草穀等。飢其餓馬。馬皆不食。唯悲鳴垂淚。諦聽法要。於是遠近敬伏。從化。故名馬鳴。言菩薩者。具云菩提薩埵。此云覺有情。亦有三釋。一約境所求。所度。二約心。有覺悟之智。餘情

慮之識三約能所。所求能求。三皆如次配覺及有情。造者製作。佛滅度後六百年內所造也。故摩訶摩耶經云。如來滅後六百歲已。諸外道等邪見競興。毀滅佛法。有一比丘名曰馬鳴。善說法要。降伏一切諸外道輩。

真諦三藏譯

總有二譯。一西印度優禪尼國沙門波羅末陀。此云真諦。梁元帝承聖三年於衡州建興寺譯成一卷。二十四紙。月氏國婆首那王子譯語。沙門智愷筆授。沙門惠顯惠旻曇振等并黃鉞大將軍太保

起信論疏卷上

七

蕭勃證義。然此三藏。梁陳二代勅譯經論。總三十四部。一百四十一卷。其博解神異。具如譯經記。二于闐國沙門實叉難陀。此云喜學。大周則天時於東都佛授記寺譯成兩卷。亦二十四紙。沙門波崙玄軌筆授復禮綴文弘景法寶法藏等證義。今解前譯。

○二解文義

三論文三總結迴向。二正述

○初歸敬述意

二初歸依三寶。二述造論意。

○初歸依三寶。○歸三寶者。略有六意。一荷恩德故。二請加護故。三令生信故。四爲儀式故。五表尊勝

故。六顯益物故。

歸命盡十方

歸命者。顯能歸至誠。歸者是依投趣向義。命者總御諸根。一身之要。人之所重。莫不爲先。舉此無二之命。以奉無上之尊。又歸者是還源義。眾生六根從一心起。而背自源。馳趣六塵。今舉命根。總攝六情。還歸一心。一心卽一體三寶。然能歸之體。必具三業。欲顯佛有天眼天耳他心故。又圓滿三業善故。成就三輪因故。或見不聞處。聞不見處。不見不聞處。則身語意如次歸依。在見聞處。則三業皆歸。

起信論疏卷上

八

今云歸命是意。意業最重矣。○盡十方者。所歸分齊也。非直一方三寶。每方非直一二等刹中三寶。顯三寶普徧故。歸心廣大故。揀異小乘故。然三寶又有住持別相同體之殊。爲福之田。皆可寶重。今所歸者。意歸別相。理該同體也。

最勝業徧知。色無礙自在。救世大悲者。

此三句。佛寶也。過小曰勝。超因曰最。業者總舉三輪業用。謂意徧知。身無礙。語能救世也。徧知有二。一真智徧知心。真如門恒沙功德。二俗智徧知心生滅門緣起差別。理量齊鑒。無倒徧知。色無礙自

在者。如華嚴說。乃有多種。今略舉四。一大小無礙。謂一一根皆徧法界。而不壞諸根之性。又不雜諸根之相。二互用無礙。謂諸根相作。三事理無礙。謂現色炳然。而不礙舉體性空。四應機無礙。謂圓廻之身。十方齊應。多機頓感。身亦不分。世者。三世間中。是眾生世間。卽所救也。大悲者。三緣之中。是無緣悲。卽能救也。無緣最勝。故云大悲。佛性論云。悲者。暫救。不能真救。大悲者。能永救濟。恒不捨離。然萬德之中。如來唯用大悲爲力。故徧舉之者。者。結德屬人。卽徧知色無礙救世之者。

起信論疏卷上

九

及彼身體相。法性眞如海。無量功德藏。

此三句。法寶也。然四種中。教淺理深。行分果圓。今取深圓。唯歸理果。故約彼佛身。以明法寶。是果法也。顯身之體相。是理法也。初句標。及者有二義。一揀前義。顯是二事。二合集義。非但歸佛。亦及法也。此中及言。顯佛與法是非一義。彼身體相。顯佛與法是非異義。體謂體大。相謂相大。以用大中。辨佛報化二身。是故體相二大。自是法身。屬法寶攝。以彼用大。依體相起。會用歸體。故云彼身體相。次二句釋。上句釋體大。法性者。明此眞體。普徧之義。非

直與前佛寶爲體。亦乃通與一切法爲性。卽顯眞如徧於染淨。通情非情。深廣之義。故智論云。在眾生數中。名爲佛性。在非眾生數中。名爲法性。言眞如者。此明法性徧染淨時。無變異義。眞者。體非僞妄。如者。性無改異。海者。約喻釋疑。疑云。眞旣不變。云何隨於染淨。旣隨染淨。云何不變。釋云。如海因風起於波浪。波雖起盡。濕性無變。無變之性。不礙起浪。浪雖萬動。不礙一濕。是故動靜無二。法準思之。下句釋相大。謂此法身如來藏中。含攝蘊積。無邊恒沙性功德故。或此句亦攝教行二法。教含所

起信論疏卷上

十

詮之德。行攝所成之功。當知此中。通四法寶。俱有含藏之義。又海之一字。通喻體相。永絕百非。如海甚深。包含萬物。如海廣大。無德不備。如海珍寶。無像不現。如海現影也。

如實修行等。

此句僧寶也。僧通凡聖。寶唯聖位也。聖通大小。菩薩爲勝。是故此中。唯歸地上大菩薩僧。謂證理起行。名如實修行。下文云。依法力熏習。是地前行。如實修行。是地上行。滿足方便。是地滿位。此中舉中等取後也。又依寶性論。就地上菩薩。約正體後得。

說二修行。彼論云。一如實修行。了如理一味。二徧修行。備知一心有恒沙法界。今此文中。舉正體等。取後得。故云等也。○又解。次上一句。亦屬僧寶。上句舉德。取人。謂地上菩薩。隨修一行。萬行集成。其一一行。皆等法界。積功所得。故云功德。人能攝德。故名爲藏。下句卽正歎行德也。據後譯云。無邊德藏僧。勤求正覺者。卽符後解也。然菩薩雖屬僧寶。修行所成之德。則屬法寶。由是前解攝屬法也。亦如體相是佛法身。而攝入法寶。故知此句文通上下。

起信論疏卷上

土

○二述造論意。

爲欲令眾生除疑捨邪執。起大乘正信。佛種不斷。故述造論意也。亦是歸敬意。初句舉所爲機。所爲機者。已如前辨。次二句明所成益。上句令離過。由疑故迷真。失於樂也。由執故起妄。種於苦也。十地論中。菩薩三種觀於眾生。起大慈悲。一遠離最上第一義樂。二具足諸苦。三於彼二顛倒。解云。眞樂本有。失而不知。妄苦本空。得而不覺。故云顛倒。故令菩薩興悲造論。故解釋分中。文有三段。一顯示正義。卽除疑也。令悟眞樂。二對治邪執。卽捨邪執也。

令離妄苦。三分別發趣道相。卽此下句。起大乘正信也。意令成行。旣於眞不疑。於邪不執。未知於何起行。謂於大乘。以一心三義。是究竟根本法故。未知於大乘起何行。謂起正信。以信是眾行之本故。卽翻疑云信。翻邪執云正。後一句明成益意。謂令眾生離過求行。使信成滿。入住不退。堪受佛果。故云佛種不斷。故下云。信成就發心者。畢竟不退。入如來種中。正因相應等。○又解。除疑者。汎論疑惑。乃有多途。求大乘者。所疑有二。一者疑法。障於發心。二者疑門。障於修行。今立一心法。以遣前疑。開

起信論疏卷上

土

二種門以遣後疑。

○二正述論文。二。初標益起說。二。正陳所說。

○初標益起說。

論曰。有法能起摩訶衍信根。是故應說。

論者。揀異經律也。有法者。一心二門三大。卽所說

法體也。能起摩訶衍信根者。題目正依此立也。目題

謂大乘起信論。摩訶衍。此云大乘。謂約心眞如門。信理決

定。約心生滅門。信業果不亡。約三大中。信三寶不

壞。信根者。謂信滿入住。成根不退。根有二義。一能

持義。自分不失。二生後義。勝進上求。應說者。論主

思惟見此勝益。是故須要說也。

○二正陳所說。二。初標列。二。牒釋。

○初標列

說有五分。云何爲五。一者因緣分。

言不自起。製必有由。名爲因緣。章別餘段。故名爲分。

二者立義分。

由致既興。次宜略標綱要。以爲宗本。

三者解釋分。

宗要既略。次宜廣釋。令其生解。

起信論疏卷上

三

四者修行信心分。

次宜依解起行。有解無行。如負數他寶。是所不應。

五者勸修利益分。

雖示行儀。鈍根懈怠。次宜舉益勸修也。然五中。初

一是序分。次三是正宗。後一是流通。

○二牒釋。五。初因緣分。二立義分。三解釋分。四修行信心分。五勸修利益分。

○初因緣分。二。初正釋。二。通難。

○初正釋

初說因緣分。標。問曰。有何因緣而造此論。假。問。答曰。是

因緣有八種。數。舉。云何爲八。儼。起。

一者因緣總相。所謂爲令眾生離一切苦。得究竟樂。非求世間名利恭敬故。

此門通與一部論爲發起之由。故云因緣總相。總通兼正。下七則別爲當機也。一切苦者。苦苦。壞苦。行苦。分段變易二生死苦也。究竟樂者。無上菩提覺法樂。無上涅槃寂靜樂也。非求世間句。非欲令其求於後世人天利樂等。亦可論主自云。我爲益生。故造斯論。非爲名利等。故名總相。二者爲欲解釋如來根本之義。令諸眾生正解不謬故。

起信論疏卷上

四

與立義分及解釋分中。顯示正義。對治邪執。作發起因緣。以彼文中說。依一心法。有二種門。各攝一切法。卽是如來所說法門之根本。又生滅門中。本覺名如。始覺名來。始本不二。名曰如來。此卽所證本覺真理名如。能證無分別智名來。諸眾生未有無分別智時。是如無來也。今以如來依此心成。故名此心爲如來根本之義也。令諸眾生正解不謬。故具釋此義。令彼地前三賢諸菩薩等。比觀相應。故云正解。卽顯示正義也。比觀離倒。故云不謬。不謬卽對治邪執也。

三者爲令善根成熟眾生於摩訶衍法堪任不退信故。

卽下分別發趣道相也。以彼文中令利根者發決定心進趣大道堪任住於不退位故。此當十信終心。自分滿足故云成熟。進入十住正定聚中使前信心堪任不退。

四者爲令善根微少眾生修習信心故。

卽下修行信心分。初四種信心及四種修行也。以彼文中令信未滿者修行信心使滿足故。此當十信住心。以信位未滿故云微少。令進向滿故云修。

起信論疏卷上

五

信心也。

五者爲示方便消惡業障善護其心遠離痴慢出邪網故。

自此下四種機當信位初心以前三根勝難退不假多方便助成道力故各一。此中根劣易退賴多方便故有四也。四中前三爲下中上三人。後一策以勸修。今初當下品也。卽下修行信心分中。第四修行末文是也。以彼文中令業重惑多者善根難發眾生以禮懺等方便消惡業障障輕故內離頑歸痴慢外出邪魔罣網。

六者爲示修習止觀對治凡夫二乘心過故。

當中品也。卽下第五修行止觀門。以彼文中雙明止觀遣凡小二執故云對治也。

七者爲示專念方便生於佛前必定不退信心故。

當上品也。卽下修行信心分末復次眾生初學是法下勸生淨土門等。以彼文中舉勝方便令彼觀解分得相應眾生恐後報遷遇緣成退故令往生使不退也。

八者爲示利益勸修行故。

卽下勸修利益分也。以彼文中舉彼損益勸物修。

起信論疏卷上

六

捨卽總策成前諸行也。

有如是等因緣所以造論。

總結

○二通難。二初難。二通。

○初難

問曰。修多羅中具有此法何須重說。

○二通。二初縱問略標。二以義具釋。

○初縱問略標

答曰。修多羅中雖有此法。縱其問辭以眾生根行不等受

解緣別。

根行不等者。或利或鈍。樂廣樂略。假經假論之殊也。受解緣別者。遇佛遇教之異也。

○二以義具釋。二初明餘機不假此論。二明當機須造此論。

○初明餘機不假此論。三初勝機遇佛悟。二自力聞經悟。三劣機因尋廣論悟。

○初勝機遇佛悟。○尚無紙素之經。何況須論。

所謂如來在世。時勝根眾生利根。勝根能說之人。色心業勝。

緣圓音一演。勝顯緣相異類等解。勝顯根則不須論。假論也。

色心圓音。即三業矣。一音及圓音者有二。初如來

一音。說一切法。無不顯了。故名圓音。華嚴云。如來

於一語言中。演出無邊契經海。二如來同一切音。

起信論疏卷上

七

故云圓音。華嚴云。一切眾生語言法。一言演說盡

無餘。以一切音即一音。故云一音。一音即一切音。

故云圓音。一一語音。徧窮生界。而其音韻恒不雜

亂。若音不徧。則是音非圓。若音等徧。失其韻曲。則

是圓非音。今不壞曲而等徧。不動徧而差韻。此是

如來圓音。非是心識思量境界耳。

○二自力聞經悟。

若如來滅後。或有眾生。能以自力廣聞而取解者。或

有眾生。亦以自力少聞而多解者。自力聞廣經文。得解佛意。不須他論。故云自力。此

具文持義持。亦以自力尋略經文。而能深解佛意。故亦不須他論。此有義持無文持。

○三劣機因尋廣論悟。

或有眾生。無自心力。因於廣論而得解者。

但依經文。不能解意。因他廣論而得解了。故云無

自心力。此有文持無義持。

○二明當機須造此論。二初機。二結。

○初機。

自有眾生。復以廣論文多為煩。心樂總持少文而攝多義。能取解者。

起信論疏卷上

六

此人不樂繁文。唯依文約義豐之論。深解佛經所說之旨。故云總持多義。然不須廣者有二意。一根

利不假。二心煩不耐。

○二結。

如是此論。為欲總攝如來廣大深法。無邊義故。應說

此論。

此論文句雖少。總攝一切大乘經論深旨。深者如

理智境。廣者如量智境。無邊者深廣無際。

○二立義分。二初結前生後。二正立義宗。

○初結前生後。

已說因緣分。次說立義分。

○二正立義宗。初標總開別。二寄問列名。三依名辨相。

○初標總開別。

摩訶衍者。總說有二種。

○二寄問列名。

云何爲二。一者法。二者義。

法者。出大乘法體。謂自體故。對智故。顯義故。卽宗

本法也。大位在因。通於染淨。義者。辨大乘名義。何

故此心是大乘耶。謂此心具三大義。故名爲大。有

二運轉。故名爲乘。是故先顯法體。後釋義理。收義

起信論疏卷上

九

足也。依宗所顯差別義理。大位在果。唯取於淨。

○三依名辨相。初二義

○初法。○起下釋中初釋法體之文。文二。初舉法總立。二開門

別

○初舉法總立。

所言法者。謂眾生心。是心則攝一切世間出世間法。

依於此心。顯示摩訶衍義。

眾生心者。出其法體。謂如來藏心。具和合不和合

二門。以其在於眾生位故。若在佛地。則無和合義。

以始覺同本。唯是真如。卽當所顯義也。今就隨染

眾生位中。故得具二門也。是心攝一切法者。辦法

功能。以其此心。體相無礙。染淨同依。隨流反流。唯

轉此心。是故若隨染成於不覺。則攝世間法。不變

之本覺。及反流之始覺。則攝出世間法。此猶約生

滅門辨。若約真如門者。則鎔融含攝。染淨不殊。下

文具顯。摩訶衍者。釋其法名。謂依此一心。宗本法

上。顯示大乘三大之義。故名此心以爲法也。

○二開門別立。二初責總立難。二開別釋成。

○初責總立難。

何以故。

起信論疏卷上

三

責有二意。一云。心通染淨。大乘唯淨。如何此心能

顯彼義。二云。心法是一。大乘義廣。如何一心能具

示彼。

○二開別釋成。○釋初意云。大乘雖淨。相用必對染

成。今生滅門中。既具含染淨。故能顯也。以廢染之

時。則無淨用故。釋後意云。心法雖一。而有二門。真

如門中。示大乘體。生滅門中。具示三大。大乘之義

莫過是三。故依一心得具示也。

是心真如相。卽示摩訶衍體故。

總舉真如門。起下文中。卽是一法界。以下文相者。

即是真如相。起下復次真如者。依言說分別以下文。

是心生滅因緣相。能示摩訶衍自體相用故。

心生滅者。隨熏變動故。總舉生滅門。起下依如來藏故。有生滅心以下文。因緣者。生滅緣由故。起下復次生滅因緣以下文。相者。生滅之狀故。起下復次生滅相者以下文。何故真如門中云。卽示生滅門中云。能示者。以真如是不起門。與彼所顯詮旨不別。故云。卽示。以是不起。故唯示體。生滅是起動門。染淨既異。詮旨又分。能所不同。故不云。卽體。謂

起信論疏卷上

三

生滅門中本覺之義。是生滅之自體。生滅之因。故在生滅門中亦辨體也。翻染之淨相。及隨染之業用。並在此門中。故具詮耳。是以下文釋生滅門內具顯所示三大之義。意在於此。何故真如門中直云體。生滅門中乃云自體等者。以所示三大義。還在能示生滅門中。顯非別外。故云。自也。問。真如是不起門。但示於體者。生滅是起動門。應唯示於相用。答。真如是不起門。不起不必由起立。由無有起故。所以唯示體。生滅是起動門。起必賴不起。起含不起。故起中具示三大。餘如下說。

○二義。○起下復次真如自體相者。以下釋義之文。
文二。初大。二乘。

○初大。

所言義者。標則有三種。數云何爲三。微起一者體大。謂一切法。真如平等。不增減故。二者相大。謂如來藏。具足無量性功德故。三者用大。能生一切世間出世間善因果故。

體大者。真性深廣。凡聖染淨。皆以爲依。故受大名也。真如平等。不增減者。謂隨流加染而不增。反流除染而不減。又反流加淨。不增。隨流缺淨。不減。良

起信論疏卷上

三

以染淨之所不虧。始終之所不易故。相大者。卽二種如來藏中不空之義。謂不異體之相。故云性德。如水八德。不異於水也。用大者。謂隨染業行。然此用大。是報化二身麤細之用。令諸眾生。始成世善。終成出世善也。下文顯之。何故唯言善。不云不善者。以不善法。違真理故。是所治故。非其用也。若爾諸不善法。應離於真。釋云。以迷真故。不得離真。以違真故。非其用也。

○二乘。

一切諸佛。本所乘故。一切菩薩。皆乘此法。到如來地。

故。

諸佛者。標果望因。以解乘也。菩薩者。舉因望果。以成運也。卽始覺之智。是能乘。本覺之理。爲所乘。故梁攝論云。乘大性故。名爲大乘。

○三解釋分。二。初結前生後。二分門解釋。

○初結前生後。

已說立義分。次說解釋分。

○二分門解釋。二。初標數徵列。二。牒名辨相。

○初標數徵列。

解釋有三種。云何爲三。一者顯示正義。二者對治邪

起信論疏卷上

圭

執。三者分別發趣道相。

顯示正義者。正釋所立大乘法義也。對治邪執者。旣明正理。須遣異計也。分別發趣道相者。趣正理之階降也。

○二牒名辨相。三。初顯示正義。二對治邪。三分別發趣道相。

○初顯示正義。二。初總。二別。

○初總。○釋上立義分中。眾生心攝一切等也。於中

二。初依法開門。二。二門該攝。

○初依法開門。

顯示正義者。牒章依一心法。有二種門。云何爲二。一者

心真如門。二者心生滅門。

謂一如來藏心。含於二義。一約體絕相義。卽真如門。謂非染非淨。非生非滅。不動不轉。平等一味。性無差別。眾生卽涅槃。不待滅也。凡夫彌勒。同一際也。二隨緣起滅義。卽生滅門。謂隨熏轉動。成於染淨。染淨雖成。性恒不動。正由不動。能成染淨。是故不動亦在動門。是故下文識有二義。中本覺是也。上文生滅門中。自體是也。勝鬘云。不染而染。染而不染等。楞伽云。如來藏名阿賴耶識。而與無明七識共俱。如大海波。常無斷絕等。又云。如來藏者。爲無始虛僞惡習所熏。名爲識藏。又云。如來藏者。爲善不善因。受苦樂與因俱。若生若滅。猶如伎兒。作諸伎樂等。此等並約生滅門說也。然此二門。舉體通融。際限不分。體相莫二。此無二處。諸法中實。不

起信論疏卷上

圭

○二二門該攝。二。初立。二釋。

○初立。

是二種門。皆各總攝一切法。

上立義分中。直云攝。今釋中云。各攝者。以一心含通別二門故。今分通別。又各攝故。以真如門。是染

淨通相。通相之外。無別染淨。故得總攝一切諸法。生滅門者。別顯染淨。染淨之法。無所不該。故亦總攝一切諸法。通別雖殊。齊無所遺。故云各攝。又以此卽是真如隨緣和合。變作諸法。諸法卽無異體。還攝真如門也。以此二門齊攝不二。故得說爲一心也。問。二門旣齊相攝者。何故上文真如門中。唯示大乘體。不顯於相用。生滅門中。具顯三耶荅。眞如是泯相顯實門。不壞相而卽泯。故得攝於生滅。以泯相而相不存。故但示於體也。生滅是攬理成事門。不壞理而成事。故得攝於真如。以成事而理

聖信論疏卷上

三

不失。故具示三大。問。前旣泯相相不存。但示於體。亦可攬理理不存。應但示相用。何故不齊耶。荅。生滅起必賴於眞。故攬理理不失。眞如未必藉生滅。故泯相相不存。相不存。故唯示於體。理不失。故具示於三。是故攝義是齊。示義別也。

○二釋。

此義云何。以是二門不相離故。

責云。若二門各別。不可相從。若本唯一心。未容影攝。下荅云。以體相不離故。如金與莊嚴具。若以金收具。具無所遺。以具攝金。金無不盡。良以二門一

揆全體徧收。此義亦然。思之可見。

○二別。○釋上立義分中何以故下二門別義。於中

二。初別辨二門顯動靜不一。二會相入實顯動靜不二。

○初別辨二門顯動靜不一。二。初眞如門。初顯體離言以明觀智境。

○初眞如門。二。依言辨德以明生信境。

○初顯體離言以明觀智境。○釋上立義分中眞如

義也。於中二。初正舉法體。二。問答斷疑。

○初正舉法體。二。初正顯如體。二會執釋名。

○初正顯如體。三。初就實略標。二會妄。顯實二結眞離妄。

○初就實略標。

聖信論疏卷上

三

心眞如者。體章卽是一法界大總相法門體。所謂心性不生不滅。

一法界者。卽無二眞心。爲一法界。此非筭數之一

謂如理虛融。平等不二。故稱爲一。又對下依言有

二義。故今約體。但云一也。依生聖法。故云法界。中

邊論云。法界者。聖法因義故也。大總相法門體者。

二門之中。不取別相門。於中但取總相。然亦該收

別盡。故云大也。此一法界。舉體全作生滅門。舉體

全作眞如門。爲顯此義。故云體也。軌生物解曰。法

聖智通遊曰。門不生不滅者。釋上法體謂隨妄不

生約治不滅。又修起不生。處染不滅。故攝論云。世間不破。出世間不盡。

○二會妄顯實。

一切諸法。唯依妄念而有差別。若離心念。則無一切境界之相。

妄執者云。現見諸法差別遷流。云何乃言性無生滅。釋云。差別相者。是汝徧計妄情所作。本來無實。如依病眼。妄見空華。疑者又云。以何得知依妄念生。釋云。以諸聖人離妄念故。既無此境。即驗此境定從妄生。又若此境非妄所作。定實有者。聖人不

起信論疏卷上

主

見。應是迷倒。凡夫既見。應是覺悟。如不見空華。誰是病眼。

○三結真離妄。

是故一切法。從本以來。離言說相。離名字相。離心緣相。畢竟平等。無有變異。不可破壞。唯是一心。故名真如。

從本以來。是所執本空故。真心不動故。由此一切諸法。皆即真如也。離言說相者。非如音聲之所說也。離名字相者。非如文句之所詮表也。此二句言語路絕。非聞慧境。離心緣相者。非意言分別故。即

心行處滅。非思慧境。上來離偽妄故名真。自下離異相故名如。又下三句。展轉相釋。離世間。非修慧境。唯正智與之相應。畢竟平等者。雖徧通染淨。而性恆無二。所以得無二者。以在緣時。始終不改變。故曰無有變異。所以在有為中。得不變異者。以不同有為可破壞故。此則在染不破。治道不壞。三句展轉相。唯是一心者。結歸法體也。故名真如。依義立名。

○二會執釋名。二初釋。

○初釋三。初正會謂執。二結名。釋疑。三約相釋遣。

○初正會謂執。

起信論疏卷上

主

以一切言說假名無實。但隨妄念。不可得故。言真如者。亦無有相。

明言教非實。不可如言取也。但隨妄念。不可得故。釋成無實所以也。恐諸凡愚聞上真如名。則謂論主自語相違。上文既云離名字相。何故復立此真如名。故今釋遣。假名非實。不相違也。良以名依相立。但是徧計所緣故。楞伽經云。相名常相隨。而生諸妄想。故名相雙遣。

○二結名釋疑。

謂言說之極。因言遣言。

言說之極者。立名分齊也。疑云。既絕名相。但假立客名者。何故不立餘名。而唯云真如耶。釋云。真如者。是言說之極。謂此名之後。更無有名。則諸名之中。最後邊際。故攝論中。十種名內。真如是第十究竟名。故云極也。因言遣言者。立名之意也。立此極名。爲遣於名。如以聲止聲也。若無此名。無以遣名。若存此名。亦不成遣名。

○三約相釋遣

此真如體。無有可遣。以一切法悉皆真故。亦無可立。以一切法皆同如故。

起信論疏卷上

无

二釋。一云。外人見前文雙遣真如名相。則謂真如本體。亦是可遣之法。則生斷見。故此釋云。但遣虛妄名相。不遣真如實法。以是妙智觀境故。二云。非以真體遣生滅法也。何以不遣。云下一切法悉皆真故。釋上不遣也。以法悉真。無法可遣。又以生滅門染淨等法。卽無自性。不異真如。故不待遣也。外人既問真理不遣。則謂有法可立。當情執取。故釋云。亦無可立。以離妄情故。又生滅等法。卽真。不待立也。何以不立。云下一切法皆同如故。真故不可遣。如故不可立。又生滅等法。本來同如。故此真如。未曾

不顯。更何所立也。

○二結

當知一切法。不可說。不可念。故名爲真如。結離言絕慮也。

○二問答斷疑。

二初疑真絕修問。二舉真勸修答。

○初疑真絕修問。

問曰。若如是義者。諸眾生等。云何隨順。而能得入。隨順問方便觀。得入問正觀也。

○二舉真勸修答。

答曰。若知一切法。雖說。無有能說可說。雖念。亦無能

起信論疏卷上

丰

念可念。是名隨順。

初答方便觀也。說念皆無能所者。明念卽無念。非滅於念。非滅念故。故名雖念。離於斷見也。卽無念故。皆無能所。離於常見也。於一念間。離此二見。無此二故。故能稱順中道。隨順法性。又亦可雖在於念等。卽觀此念等。常無能所。雖未能離念。而順於無念。故名隨順也。

若離於念。名爲得入。

此答正觀也。如上久觀不已。卽能離茲妄念。契彼無念真理。故名正觀。云得入者。觀智契入也。十地

論云。智行處故。又亦可正知無能所之念亦離。方入真如。

○二依言辨德以明生信境。○釋上立義中真如相也。於中三。初舉數總標。二開章略辨。三依章廣釋。

○初舉數總標。

復次真如者。依言說分別有二種義。

顯此二義者。若離於言。卽惟一味。今旣依言。故說有二。卽顯不可隨言執取也。但爲生物信解。故說此文。故十地論云。何故不但說無言。示現依言求解故。

起信論疏卷上

三

○二開章略辨。

云何爲二。起微一者如實空。以能究竟顯實故。二者如實不空。以有自體。具足無漏性功德故。

如實空者。此以如實之中。空無妄染。非謂如實自空。此則如實之空也。以妄空故。遂能顯示真理。故

云顯實也。不空有二義。一異妄無體故。有自體二異

恒沙有流煩惱故。具足功德故佛性論偈云。由客塵空

故。與法界相離。無上法不空。與法界相隨。

○三依章廣釋。二。初空。二不空。

○初空。三。初略明。二廣釋。三總結。

○初略明。

所言空者。從本以來。一切染法不相應故。謂離一切法差別之相。以無虛妄心念故。

一切染法。總舉能所分別。皆不相應也。一切法差別者。所取相也。虛妄心念者。能取見也。又以妄境從妄念生。故釋顯空無也。良以倒心妄境。情有理無。真如之德。理有情無。故不相應也。

○二廣釋。

當知真如自性。非有相。非無相。非非有相。非非無相。非有無俱相。非一相。非異相。非非一相。非非異相。非

起信論疏卷上

三

一異俱相。

非有相。明真離妄有也。惑者云。旣其非有。卽應是無。故釋云。非無也。惑者聞上非有非無。則謂雙非是真如法。釋云。我非汝謂有。說非有。非謂法體是非有。非汝謂無。說非無。非謂法體是非無。故又非却雙非也。惑者云。我上立有立無。汝立雙非。雙非若存。卽有無隨喪。今雙非旣非。我有無還立。釋云。我非汝雙非。故說非非。非許雙是。如何復執俱相也。一異。準前四句可知。然執取雖多。總攝不過此二四句。故廣百論云。復次。爲顯世間所執諸法。皆

非真實。及顯外道所執不同故。偈曰。有非有俱非。一非一雙泯。隨次而配屬。智者達非真。彼論次第廣破四宗外道。今此約展轉計執。不同彼論後段。破外道說。

○三總結

乃至總說。依一切眾生。以有妄心。念念分別。皆不相應。故說爲空。若離妄心。實無可空故。

眾生有妄心者。妄計塵沙難可徧歷。故今總攝。辨不相應。此順結也。若離妄心。實無可空者。反結也。以對染無說。真爲空。非無如體以爲空也。亦可此

起信論疏卷上

三

文是釋疑。疑者聞上真空。則撥無真體。及恒沙功德。故爲此釋。是則聞空。不異不空也。

○二不空。初二釋疑。

○初正釋。

所言不空者。已顯法體空無妄故。顯後。即是真心。舉

常常德恒德不變淨法滿足淨德則名不空。結也。

常。常德也。恒。樂德也。不變。我德也。以離變易苦。非業所係。自在故也。淨法滿足。淨德也。

○二釋疑。

亦無有相可取。以離念境界。惟證相應故。

惑者聞淨法不空。則謂同於情執之有。故此釋也。是則不空不異於空也。以離念二句。釋無相所以也。若妄念所緣。是則有相。既唯真智之境。明知無妄執之相也。

○二生滅門。二初釋生滅心法。二辨所示之義。

○初釋生滅心法。二初明染淨生滅。二初就體總標。二依義別解。

○初就體總標。三初標體。二辨相。三立名。

○初標體。

心生滅者。依如來藏故。有生滅心。

起信論疏卷上

三

標體也。謂不生滅心。因無明風。動作生滅。故說生

滅。心依不生滅心。然此二心。竟無二體。但約二義

以說相依。如不動之水。爲風所吹。而作動水。動靜

雖殊。而水體是一。亦得說言依靜水故。有其動水。

當知此中理趣亦爾。宜可思之。謂自性清淨心。名

如來藏。因無明風。動作生滅。故云依如來藏有生

滅心也。楞伽勝鬘。俱同此說。此顯真心隨動。故作

生滅。非謂舉所依取能依。以此門中有二義。故能

示三大。是故通攝所依。亦入此門。

○二辨相。

所謂不生不滅與生滅和合非一非異。

不生不滅者是上如來藏自性清淨心。動作生滅不相離故。故云和合。非謂別有生滅來與真如合。謂生滅之心。心之生滅無二相故。心之不生滅。因無明成生滅之心。從本覺起而無二體。不相捨離。故下文云。如大海水。因風波動。水相風相。不相捨離。乃至廣說。此中水之動是風相。動之濕是水相。以水舉體動故。水不離於風相。無動而非濕。故動不離於水相。心亦如是不生滅。心舉體動故。心不離於生滅之相。生滅之相莫非神解故。生滅不離。

起信論疏卷上

三

於心相。如是不離。名爲和合。此是不生滅心與生滅合。以是隨緣門故。非是生滅與不生滅合。以此非是向本真如門故。非一非異者。真如全體動故。心與生滅非異。而恆不變真性故。與生滅不一。依楞伽經。以七識染法爲生滅。以如來藏淨法爲不生滅。此二和合爲阿黎耶識。以和合故。非一非異。非異門者有三種。一以本從末。明不異。經云。如來藏是善不善因。能徧興造一切趣生。乃至下云。若生若滅等。又經云。佛性隨流成別味等。二攝末歸本。明不異。經云。眾生卽如也。又涅槃云。十二因緣。

卽佛性故。又十地論云。三界唯一心者。第一義諦也。又此論下文云。四相本來平等。同一覺故。又前卽末之本。本無別本。故唯有生滅。更無別法。可相異也。後卽本之末。末無別末。故唯有不生滅。亦無別法。可相異也。三本末平等。明不異。經云。甚深如來藏。而與七識俱。又經云。阿黎耶識。名如來藏。而與無明七識共俱。如大海波。常不斷絕。又論云。唯真不生。單妄不成。真妄和合。方有所爲。此則本末際限不分。故云不異也。不一義者。卽以前攝末之本。唯不生滅故。與彼攝本之末。唯生滅法而不一。

起信論疏卷上

三

也。依是義。故經云。如來藏者。不在阿黎耶中。是故七識有生有滅。如來藏者。不生不滅。解云。此中唯生滅是七識。唯不生滅是如來藏。二義旣分。遂使黎耶無別自體。故云不在中。此約不一義說。非謂不和合。何以故。此中如來藏不生滅。卽七識生滅之不生滅。故與自生滅不一也。七識生滅。卽如來藏不生滅之生滅。故與自不生滅亦不一也。此中非直不乖。不異。以明不一。亦乃由不異。故成於不一。何以故。若如來藏隨緣作生滅時。失自不生滅者。則不得有生滅。是故由不生滅。得有生滅。是則。

不異故不一也。又此中真妄和合。諸識緣起。以四句辨之。一以如來藏。唯不生滅。如水濕性。二七識。唯生滅。如水波浪。三黎耶識。亦生滅。亦不生滅。如海含動靜。四無明倒執。非生滅。非不生滅。如起浪猛風。非水。非浪。此四義中。隨舉一義。卽融攝自體。緣起義理。無二相故。此中且約濕性。不失義邊。動靜不一。故說水不在於浪中。豈可此浪離水之外。別有體耶。餘義準此思之。問。旣云動靜不一。則應云。如來藏不在七識中。何故。乃云。不在黎耶中。答。黎耶融動靜。動靜不二是黎耶。今旣動靜分。黎耶

起信論疏卷上

三

無別體。故云不在中也。問。黎耶旣通動靜。不應唯在生滅門。答。爲起靜以成動。無別有動體。是故靜性隨於動。亦在生滅中。非直黎耶具動靜。在此生滅中。亦乃如來藏。唯不動。亦在此門中。何以故。以彼生滅。無別體。故應思準之。又若一者。生滅識相滅盡之時。真心應滅。則墮斷過。若是異者。依無明風熏動之時。靜心之體。應不隨緣。則墮常過。離此二邊。故非一異。又若一則無和合。若異亦無和合。非一非異。故得和合也。如經云。譬如泥團微塵。非異非不異。金莊嚴具。亦復如是。若泥團微塵異者。

非彼所成。而實彼成。是故非異。若不異者。泥團微塵。應無差別。如是轉識藏識。真相若異者。藏識非因。若不異者。轉識滅。藏識亦應滅。而自真相實不滅。是故非自真相滅。但業相滅。解云。此中真相是如來藏。轉識是七識。藏識是黎耶。今此論主。總括彼楞伽上下文意。作此安立。故云非一異也。

○三立名。

名爲阿黎耶識。

此生滅不生滅。卽之義不一。辨之心不異。目此二義不二之心。名阿黎耶識。或云阿賴耶者。但梵音

起信論疏卷上

五

楚夏耳。梁朝眞諦三藏。就名翻爲無沒識。今時契法師。就義翻爲藏識。藏是攝藏義。無沒是不失義。義一名異也。所攝名藏。謂諸眾生取爲我故。所以然者。良以真心不守自性。隨熏和合。似一似常。故諸愚者。以似爲實。執爲內我。我見所攝。故名爲藏。由是義故。二種我見。永不起位。失賴耶名也。又能藏自體於諸法中。又能藏諸法於自體內。論云。能藏所藏。我愛執藏。此之謂也。此依義立名也。

○二依義別解。

三。初釋上生滅心。二。釋上生滅因緣。三。釋上生滅之相。初開數辨德。二寄問列名。三依名辨釋。

○初開數辨德。

此識有二種義。

此義稍難。今總括上下文。略敍其意。餘可至文當知。何者。謂真如有二義。一不變義。二隨緣義。無明亦二義。一無體卽空義。二有用成事義。此真妄中。各由初義。故成上真如門也。各由後義。故成此生滅門也。此隨緣真如。及成事無明。亦各有二義。一違自順他義。二違他順自義。無明中初違自順他。亦有二義。一能反對詮示性功德。二能知名義成淨用。違他順自亦有二義。一覆真理。二成安心。真

起信論疏卷上

妄

如中違他順自亦有二義。一翻對妄染顯自真德。二內熏無明令起淨用。違自順他亦有二義。一隱自真體義。二顯現妄法義。此上真妄各四義中。由無明中反對詮示義。及真如中翻妄顯德義。從此二義。得有本覺。又由無明中能知名義。及真如中內熏義。從此二義。得有始覺。又由無明中覆真義。及真如中隱體義。從此二義。得有根本不覺。又由無明中成妄義。及真如中顯妄義。從此二義。得有枝末不覺。此生滅門中。真妄略開四義。廣卽有八門。若約兩兩相對。和合成緣起分。相有四門。謂二

覺二不覺。若本末不相離。但唯有二門。謂覺與不覺。若鎔融總攝。唯有一門。謂一心生滅門也。又若約諸識分相門。本覺本不覺。在本識中。餘二在生起事識中。若約本末不二門。並在一本識中。故云此識有二義也。問。此中一識有二義。與上一心有二門。何別耶。答。上一心中。含於二義。謂不守自性。隨緣義。及不變自性絕相義。今此但就隨緣門中。染淨理事無二之相。明此識也。是則前一心義寬。該收於二門。此一識義隘。局在於一門。問。此中本覺。與上真如門何別。答。真如門約體絕相說。本覺

起信論疏卷上

罕

約性功德說。謂大智慧光明義等。名本覺相。本者是性義。覺者是智慧義。以此皆爲翻妄染顯故。在生滅門中攝。以真如門中。無翻染等義故。與此不同也。是故體相二大。俱名本覺。並在生滅門中。故得具三大也。

能攝一切法。生一切法。

上二門中。云皆各總攝。此中不云各者。以此二義。陞於二門故。但明一識。由含二義。故攝一切。不言二義各攝一切。又上文中。但云攝而不云生者。以真如門無能生義故。此識之中。以不覺熏本覺。故

生諸染法。流轉生死。以本覺熏不覺。故生諸淨法。反流出纏。成於始覺。依此二義。徧生一切染淨法。故云能生也。下四熏習中廣辨此也。非直相熏能生諸法。亦乃生諸法已不離此心。爲此心所攝。故云攝。如上二門各攝處釋也。

○二寄問列名。

云何爲二。一者覺義。二者不覺義。

○三依名辨釋。三。初明覺義。二明不覺。三雙辨同異。

○初明覺。○約淨法明心生滅故。文二。初略辨二覺。二廣明二覺。

○初略辨始本二覺。二。初本覺。二始覺。

聖信論疏卷上

聖

○初本覺。二。初顯本覺體。二釋本覺名。

○初顯本覺體。

所言覺義者。章。謂心體離念。離念相者。等虛空界。無所不徧。法界一相。卽是如來平等法身。依此法身。說名本覺。

名本覺。

心體離念者。離於妄念。顯無不覺也。等虛空界者。

非唯無不覺之闇。乃有大智慧光明義等故也。虛

空有二義。以況於本覺。一周徧義。無所徧。謂橫徧三

際。豎通凡聖故。二無差別義。法界一相。謂在纏出障。性

恆無二故。如來平等法身者。欲明覺義出纏相顯

故。既是法身之覺。理非新成。故云本也。無性攝論云。無垢無罣礙智。名爲法身。金光明經。名大圓鏡智。爲法身等。皆此義也。

○二釋本覺名。

何以故。本覺義者。對始覺義說。以始覺者。卽同本覺。

何以故。責其立名。責有二意。一云。上開章中。直云

覺義。何故今結乃名本覺。二云。此中旣云本覺。何

故上文但云覺耶。以對始故說之爲本。答初意也。

又以本覺隨染。生於始覺。還待此始覺。方名本覺。

故。始覺卽同本覺者。以至心源時。始本無二相故。

聖信論疏卷上

聖

是故上文但云其覺。答後意也。又此始覺是本所

成。還契心源。融同一體。方名始覺故。問。若始覺異

本。則不成始。若始同本。卽無始覺之異。如何說言

對始名本。答。今在生滅門中。約隨染義。形本不覺。

說爲始覺。而實始覺至心源時。染緣旣盡。始本不

殊。平等絕言。卽真如門攝也。故本覺之名。在生滅

門中。非真如門也。

○二始覺。

始覺義者。名。依本覺故。而有不覺。依不覺故。說有始

覺。

明起始覺之所由也。依本覺有不覺者。謂卽此心體隨無明緣。動作妄念也。依不覺有始覺者。本覺內熏力故。漸有微覺。厭求乃至究竟。還同本覺。故下文云。本覺隨染生智淨相者。卽此始覺也。此文意明本覺成不覺。不覺成始覺。始覺同本覺。以同本覺故。則無不覺。無不覺故。則無始覺。無始覺故。則無本覺。無本覺故。平等平等。離言絕慮。是故佛果圓融。脩然無寄。尙無始本之殊。況有三身之異。但隨物心現。故說報化之用。下文顯之。

○二廣明二覺。二。初始覺。二本覺。

起信論疏卷上

聖

○初始覺。三。初總標因果二覺。二廣寄四相釋成。二明始不異本。

○初總標因果二覺。

又以覺心源故。名究竟覺。不覺心源故。非究竟覺。

心源者。染心之源。謂性淨也。又麤相之源。謂生相也。究竟者。始覺道圓。同於本覺故也。此在佛地。非究竟者。不了其源。始未同本故也。此在金剛以還。

○二廣寄四相釋成。○前三相。釋上不究竟覺。後一相。釋上究竟覺。文二。初正寄四相顯其四位。二引經釋成心源無念。

○初正寄四相顯其四位。○此中文意。將四相麤細寄顯反流四位。以明始覺分齊。然此四相約真心。

隨熏麤細差別。寄說爲四。非約一刹那心明四相也。今以二門略辨。一總明。二別說。總者。原夫心性離念。無生無滅。而有無明。迷自心體。違寂靜性。鼓動起念。有生滅四相。是故由無明風力。能令心體生住異滅。從細至麤。經云。佛性隨流成種種味等。又經云。卽此法身。爲煩惱之所漂動。往來生死。名爲眾生。此下文云。自性清淨心。因無明風動等。今就此義。以明四相。旣鼓靜令動。遂有微著不同。先後際異。就彼先際最微。名爲生相。乃至後際最麤。名爲滅相。故佛性論云。一切有爲法。約前際與生。

起信論疏卷上

聖

相相應。約後際與滅相相應。約中際與住異相相應也。二別說者。對彼下文。約位別分。生相有一。住相有四。異相有二。滅相還一。生相一者。名爲業相。謂由無明不覺心動。雖有起滅而相見未分。以無明力故。轉彼淨心。至此最微。名爲生相。甚深微細。唯佛能知。下文云。依無明所起識者。乃至唯佛能知故。卽下文三細中初一。及六染中後一。五意中第一。此等並同此生相攝。住相四者。一名轉相。謂由無明力。不覺前動相。卽無動故。轉成能見。二名現相。謂由無明。依前能見。不了無相。遂令境界妄。

現此二及初。並在賴耶位中。屬不相應心。三名智相。謂由無明。迷前自心所現之境。妄起分別染淨之相。故云智也。四名相續相。謂由無明。不了前所分別空無所有。更復起念。相續不斷。此二並在分別事識細分之位。屬相應心。無明與前生相和合。轉彼淨心。乃至此位。行相猶細。法執堅住。名為住相。下文三細中後二。及六麤中初二。并五意中後四。亦六染中中四。此等並同是此住相攝。言異相二者。一執取相。二計名字相。謂此無明。迷前染淨違順之法。更起貪嗔人我見愛。執相計名。取著轉

起信論疏卷上

聖

深。此在事識麤分之位。無明與前住相和合。轉彼淨心。令至此位。行相稍麤。發動身口。令其造業。名為異相。下文六麤中中二。及六染中初一。并五意中後意識。此等並同是此異相攝。言滅相一者。名起業相。謂此無明。不了善惡二業。定招苦樂二報。故廣對諸緣。造集諸業。依業受果。滅前異心。令墮諸趣。以無明力。轉彼淨心。至此後際。行相最麤。極至於此。周盡之終。名為滅相。下文六麤中第五相是也。以果報非可斷故。不論第六相也。是故三界四相。唯一夢心。皆因根本無明之力故。經云。無明

住地。其力最大。此論文當知無明能生一切染法。此之謂也。雖復從微至著。辨四相階降。然其始終。竟無前後。總此四相。以為一念。謂麤細鎔融。唯是一心。故說俱時而有。皆無自立也。然未窮源者。隨位淺深。覺有前後。達心源者。一念四相。俱時而知。經云。菩薩知終不知始。唯佛如來。始終俱知。始者。謂生相也。終者。謂餘相。乃至滅相也。既因無明不覺之力。起生相等。種種夢念。動其心源。轉至滅相。長眠三界。流轉六趣。今因本覺不思議熏力。起厭求心。又因真如所流聞熏教法。熏於本覺。以體

起信論疏卷上

聖

用同融。領彼聞熏。益性解力。損無明能。漸向心源。始息滅相。終息生相。朗然大悟。覺了心源。本無所動。今無始靜。平等平等。無始覺之異。如經所說。夢渡大河喻等。大意如此。

次正釋四相。各為四段。一能觀人。二所觀相。三辨觀利益。四結觀分齊。對文詳之。○文四。

初滅二異三住四生

○初滅

此義云何。

且總相躡前徵起。

如凡夫人。覺知前念起惡。故能止後念。令其不起。雖

復名覺。卽是不覺故。

凡夫人者。能觀人也。位在十信。覺知前念起惡者。所觀相也。謂未入十信以前。廣造身口惡業。而不覺知。今入信已。能知惡業定招苦報。故言覺知。此明覺於滅相義也。能止後念令不起者。辨觀利益也。今旣覺故。能不造惡。止滅相也。雖復名覺。卽是不覺者。結觀分齊也。能知滅相。實是不善。故不造惡。名爲雖覺。而猶未知滅相是夢。故云不覺。此但能止惡業。故云雖覺。未覺煩惱。故云不覺。

○二異。

起信論疏卷上

罽

如二乘觀智。初發意菩薩等。覺於念異。念無異相。以捨麤分別執著相故。名相似覺。

初發意菩薩等。三賢菩薩也。十解初心。名發心住。舉初等後。以此菩薩。雖留惑故。不證人空。然於人空。實得自在。故與二乘同一位論也。覺於念異者。如上所說二種異相。分別內外。計我我所。貪嗔見愛等。此二種人共了知故。明本淨心爲無明所眠。夢於異相。起諸煩惱。而今漸與智慧相應。從異相夢而得微覺。故云覺於念異也。念無異相者。旣能覺異相之夢。彼所夢異相。永無所有也。以捨麤分

別執著相故。釋上以成觀益也。起貪嗔等。名麤分別。著違順境。名執著相。以於異相夢覺。故能捨之。而猶眠在住相夢中。故云相似覺。以此位中。菩薩未至證位。二乘不了法空。故云相似覺。問。覺異相等。亦不覺後位。何不亦立不覺之名。答。據覺前不覺後。亦得名不覺。故下文乃至十地皆名不覺。若約覺業不覺惑。正名爲不覺。卽此文中。以覺了惑。正敵對故。非同業也。

○三住。

起信論疏卷上

罽

如法身菩薩等。覺於念住。念無住相。以離分別麤念相故。名隨分覺。

初地證法身徧滿。乃至九地悉同證得。皆名法身菩薩也。覺前四種住相。雖知一切法唯是識故。不起心念。麤執分別。然出觀後。於自心所現法上。猶起染淨法執分別。明彼淨心爲無明所眠。夢於住相。今與無分別智相應。從住相夢而得覺悟。反照住相竟無所有。異前人執及著外境。故今約心但云分別。又異後根本無明生相細念。故云麤念相也。此四種住相中。於初地七地八地九地。各離一相也。下文自當顯耳。雖於麤念住相而得覺悟。猶

自眠於生相夢中。覺道未圓。故云隨分。

○四生。

如菩薩地盡。滿足方便。一念相應。覺心初起。心無初相。以遠離微細念故。得見心性。心即常住。名究竟覺。菩薩地盡。謂十地學窮。故云盡。此是總舉。下二句別明。滿足方便。是方便道。一念相應。是無間道。心無初相者。根本無明。依覺故迷。動彼靜心。令起微念。今乃覺知。離本覺。無不覺。即動心本來寂。猶如迷方。謂東爲西。悟時即西是東。更無西相。故云心無初相也。前三位中。雖各有所覺。以其動念未盡。

起信論疏卷上

契

故但言念無住相等。今此究竟位中。動念都盡。唯一心在。故云心無初相也。微細念者。業識動念。念中最細。名微細念。謂生相也。此相都盡。永無所餘。故言遠離。遠離虛妄故。真性即顯現。故云見心性也。前三位中。相未盡故。不云見性也。前三位中。覺未至源。猶夢生相。動彼靜心。業識起滅。故不云常住。今生相夢盡。無明風止。性海浪歇。湛然常住也。前未至心源。夢念未盡。求滅此動。望到彼岸。今即夢念都盡。覺了心源。本不流轉。今無始靜。常自一心。平等平等。始不異本。名究竟覺。

○二引經釋成心源無念。四。初引經證成。二重釋前文。三舉不覺之失。四顯

○初引經證成。

是故修多羅說。若有眾生。能觀無念者。則爲向佛智故。

在因地時。雖未離念。能觀如此無念道理。說此能觀。爲向佛智。以是證知佛地無念。此是舉因望果說也。

○二重釋前文。

又心起者。無有初相可知。而言知初相者。即謂無念。

起信論疏卷上

率

牒上覺心初起之言。非謂覺時知有初相故也。問。既無初相。何故說言知初相耶。故爲此荅也。如覺迷方時。知西即東。更無西相可知。言知西相者。謂即東也。覺心之時。知初動念。即本來靜。故云即無念也。

○三舉不覺之失。

是故一切眾生。不名爲覺。以從本來。念念相續。未曾離念。故說無始無明。

是前無念得名爲覺故。即顯有念。不得名覺也。以從本來未曾離念者。顯不覺所以也。即金剛以還。

一切眾生未離無始無明之念。故不得名覺。然則前對四相夢之差別。故說漸覺。今約無明眠之無異。故說不覺也。無始無明者。結成不覺義也。此顯無有染法始於無明。故云無始也。又無明依真同無始故也。

○四顯覺者之得

若得無念者。則知心相生住異滅。以無念等故。

若至心源得於無念。則徧知一切眾生。一心動轉。四相差別也。以無念等故。釋成上義。疑云。佛得無念。眾生有念。有無懸隔。何能知也。釋云。眾生有念。

起信論疏卷上

五

本來無念。佛既得彼無念。無念與念。本來平等。故云以無念等故。是故得知也。又釋云。以四相念中。各即無念。故云以無念等也。是故得無念者。徧知四相諸念也。

○三明始不異本。

而實無有始覺之異。以四相俱時而有。皆無自立。本來平等。同一覺故。

而實無有始覺之異句。標也。雖始得無念之覺。然其所覺四相。本來無起。待何不覺而有始覺之異。耶。以四相下。釋成上義也。以彼四相。一心所成。鉤

鎖連注。無有前後。離淨心外。無別自體。無自體故。本來平等。同一本覺。然未至此位。隨其智力。前後而覺。未稱法故。不得同本。今既四相俱時平等。覺知皆無自體。同一本覺。是故則無始覺之異。問。四相云何而得俱時。既其俱時。何故上文覺有前後。答。上已辨竟。謂唯一夢心。四相流轉。處夢之士。謂爲前後。各各隨其智力淺深。分分而覺。然大覺之者。知夢四相。唯一淨心。無有體性。可辨前後。故云俱時。無有自立等也。故攝論云。處夢謂經年。悟乃須臾頃。故時雖無量。攝在一刹那。此中一刹那者。

起信論疏卷上

五

即謂無念。楞伽云。一切法不生。我說刹那義。初生即有滅。不爲愚者說。解云。以刹那流轉。必無自性。無自性故。即是無生。若非無生。則不流轉。是故契無生者。方見刹那也。又淨名經中。不生不滅。是無常義等。楞伽又云。七識不流轉。不受苦樂。非涅槃。因。如來藏者。受苦樂與因俱。若生若滅。此等經意。並明真心隨流。動作諸法。諸法無別體性故。唯是真心。無有別法。是故四相即一真心。不覺即同本覺故。

○二本覺。

二。初明隨染本覺。二明性淨本覺。

○初明隨染本覺。三。初總標。二徵列。三辨相。

○初總標。

復次本覺隨染分別生二種相。與彼本覺不相捨離。此二既在隨染門中。故云生也。生已不離。不動覺體故。

○二徵列。

云何爲二。一者智淨相。二者不思議業相。

一明本覺隨染還淨之相。二明還淨本覺業用之相。此之二相。若離染緣則不得成。故云隨染也。

○三辨相。二。初智淨相。二不思議業相。

起信論疏卷上

三

○初智淨相。二。初直明淨相。二問答釋成。

○初直明淨相。二。初因。二果。

○初因。

智淨相者。章。牒謂依法力熏習。如實修行。滿足方便。故法力熏習者。真如內熏之力。及所流教法外緣熏力。此在地前。依此熏力。修習資糧。加行善根也。如實修行者。登地以上。行契真如也。滿足方便者。十地行終也。此在金剛因位極也。

○二果。

破和合識相。滅相續心相。顯現法身。智淳淨故。

由前方便。能破和合識內生滅之相。顯不生滅之性。此根本無明盡故。心無所合。即顯法身本覺義也。即於此時。能滅染心之中業相等相續之相。不滅相續心體。故令隨染本覺之心。遂即還源。成淳淨圓智。成於應身始覺義也。然此始覺。無別始起。即是本覺隨染作也。今染緣既息。始還同本。故云淳淨。淳淨智。即智德。餘皆斷德也。

○二問答釋成。一。初執真同妄問。二簡妄異真答。

○初執真同妄問。

此義云何。

起信論疏卷上

三

問意云。如上所說。動彼靜心。成於起滅。今既盡於生滅。應滅靜心。

○二簡妄異真答。三。初法。二喻。三合。

○初法。

以一切心識之相。皆是無明。無明之相。不離覺性。非可壞。非不可壞。

意云。業等染心。各諸識相。此等皆是不覺之相。非約心體說。轉難云。既言識相。皆是無明。故說滅者。皆應別有體性。離於真如。即真妄別體難也。故下答云。如此諸識。不覺之相。不離隨染本覺之性。此

無明之相與彼本覺之性。非一非異。非異故非可壞。非一故非不可壞。若依非異非可壞義說。無明即明故。涅槃經云。明與無明。其性無二。無二之性。即是實性。若就非一非不可壞義說。無明有可滅故。涅槃云。因滅無明。得菩提燈。無明滅。覺性不壞。滅惑之義。準此知之。

○二喻分四

如大海水。因風波動。一水相風相。不相捨離。二而水

非動性。三若風止滅。動相則滅。濕性不壞故。四

一真隨妄轉喻。水因風動。二真妄相依喻。水相風相不離。三真

起信論疏卷上

圭

體不變喻。水非動性。此顯非自性動。但隨他動也。四息

妄顯真喻。風止動滅。濕性不壞。此明若自性動者。動相滅時。

濕性隨滅。而但隨他動故。動相滅時。濕性不壞。

○三合亦分四

如是眾生。自性清淨心。因無明風動。一心與無明。俱

無形相。不相捨離。二而心非動性。三若無明滅。相續

則滅。智性不壞故。四

一合水隨風動也。眾生自性心。以水不能自浪。要

因風起波。風不能自現動相。要因水方現動相。故

風動即水動。無別體也。所況可知。二合風水相依

也。心與無明俱無形相。不相捨離。以濕全動故。無於水相。以動全

○二不思議業相。二初依體總標。二約用別辨。

○初依體總標。

不思議業相者。牒以依智淨相。能作一切勝妙境界。

謂與眾生作六根境界故。實性論云。諸佛如來身。

起信論疏卷上

圭

如虛空無相。為諸勝智者。作六根境界。示現微妙

色。出於妙音聲。令嗅佛戒香。與佛妙法味。使覺三

昧觸。令知深妙法。故名妙境界。

○二約用別辨。

所謂無量功德之相。一常無斷絕。二隨眾生根。自然

相應。三種種而現。得利益故。四

疏分。一橫顯業德。廣多無量。無量功德之相。二豎顯業根

深窮來際。常無斷絕。三顯業勝能。無功應機。隨眾生根。

四顯業勝益。利潤不虛。得利益現。如此則是報化二

身。真如大用。無始無終。相續不絕故。問。始得自利。

方起利他之業。云何利他說無始耶。答。以無明盡故。始覺卽本覺。然彼本覺。無始世來。常起業用。利益眾生。是故始覺同彼。亦無有始。以一切佛無差別故。無新舊故。皆無始覺之異故。本覺平等。無始無終故。故能常化眾生。是真如之用。故云不思議業也。此本覺用。與眾生心。本來無二。但不覺隨流。用卽不現。妄心厭求。用則於彼心中。稱根顯現。而不作意。我現差別。故云隨根自然相應。雖不作意。現無不益。

○二明性淨本覺。二。初總標。二別釋。

起信論疏卷上

三

○初總標。

復次覺體相者。

再辨前本覺。故標云復次。牒云者。有四種大義。與虛空等。猶如淨鏡。

以空及鏡皆有四義。故取之爲喻。一空鏡。謂離一切外物之體。二不空鏡。鏡體不無。能現萬象。三淨鏡。謂磨治離垢。四受用鏡。置之高臺。須者受用。四。前二自性淨。後二離垢淨。又初二就因隱時說。後二就果顯時說。又前中約空不空爲二。後中約體用爲二。又初二體。後二相。故云覺體相也。又初

一及第三。明有空義。第二第四。明有鏡義。故舉二喻。

○二別釋。○四鏡各依論中本名。分爲四唱。

云何爲四。一者如實空鏡。遠離一切心境界相。無法可現。非覺照義故。

如實空者。真如中。妄法本無。非先有後無也。遠離一切者。謂倒心妄境。本不相應。非謂有而不現。但以妄法理無。故無可現。如鏡非不能現。但以免角無故。無可現也。非覺照義者。有二義。一以妄念望於真智。本無覺照之功。以情執違理故。如鏡非有

起信論疏卷上

五

外物。以彼外物無照用義故。卽顯鏡中無外物體。二。以本覺望於妄念。亦無覺照功能。以妄本無故。如淨眼望空華。無照燭之功。亦如鏡望免角。此約徧計說。下約依他說。故能現世間境界。

二者因熏習鏡。謂如實不空。一切世間境界。悉於中現。不出不入。不失不壞。常住一心。以一切法。卽真實性故。又一切染法。所不能染。智體不動。具足無漏。熏眾生故。

因熏習者。有二因義。初能作現法之因。二作內熏之因。亦可初是因義。後是熏習義。故云因熏習也。

如實不空。此總出因熏法體。謂有自體及性功德。故下別釋二因。初因云。一切世間境界。悉於中現。明一切法。離此心外。無別體性。猶如鏡中能現影。也不出者。明心待熏。故變現諸法。非不待熏而自出也。不入者。離心無別能熏。故不從外入也。不失者。雖復不從內出外入。緣起之法。顯現不無也。不壞者。諸法緣集。起無所從。不異真如。故不可壞。如鏡中影。非刃能傷。以同鏡故。常住一心者。會相同體也。卽真實性者。釋成同體所由。以於心中顯現。無出入等故。卽無體性。無體性故。本來平等。不異

起信論疏卷上

五

真如。故云常住一心。乃至真實性故。下釋後因云。一切染法。所不能染。謂以性淨故。雖現染法。非染所污。非直現染之時。非染所染。亦乃由現染故。反顯本淨。如鏡明淨。能現穢物。穢物現時。反顯鏡淨。豈此穢物能污鏡耶。若不現染。則無以顯其不染。是故現染。釋成不染義也。智體不動者。以本無染。今無始淨。是故本覺之智。未曾移動。又雖現染。不爲所染。故云不動。如鏡中像。隨質轉變。然其鏡體。未曾移動也。具足無漏者。謂此本覺中。恆沙性德。無所少也。又與眾生作內熏之因。令厭生死苦。樂

求涅槃。故勝鬘經云。由有如來藏。能厭生死苦。樂求涅槃也。佛性論云。自性清淨心。名爲道諦。

三者法出離鏡。謂不空法。出煩惱礙。智礙。離和合相。淳淨明故。

法謂真如之法。出於二障。離於和合。故云出離。前明在纏性淨不空如來藏。今明不空出纏離垢法身。如寶性論云。有二淨。一自性淨。以同相故。二離垢淨。以勝相故。不空法者。出法體也。卽前因熏之法。煩惱礙者。麤細染心也。智礙者。所依無明也。離和合者。淨心出障。破業識等和合也。淳者離和合

起信論疏卷上

六

雜相故。淨者無惑染故。明者出無明故。謂大智慧光明等。

四者緣熏習鏡。謂依法出離故。徧照眾生之心。令修善根。隨念示現故。

緣熏習者。卽彼本覺出障之時。隨照物機。示現萬化。與彼眾生作外緣熏力。故云依法乃至示現故。問。前隨染中智淨。與此法出離何別。前業用。與此緣熏何別。答。前約隨染故。還淨說爲智。卽明彼智用。俱就始覺說。此約自性故。離障顯法體。卽明此法用。俱就法體說。是故前云智。此云法。前云業。此

云緣也。然法智雖殊，體無差別。以始覺卽本覺故。但今就義開說，故有境智不同也。

○二明不覺。三初根本不覺，二枝末不覺，三結末歸本。

○初明根本不覺。二初依覺成迷，二依迷顯覺。

○初依覺成迷。三一法，二喻，三合。

所言不覺義者。牒章謂不如實知真如法一故，不覺心

起而有其念，念無自相，不離本覺。法一

不了如理一味故，釋根本不覺義，如迷正方也。業

等相念，卽邪方也。邪無別體，不離正方。

猶如迷人，依方故迷。若離於方，則無有迷。二眾生亦

起信論疏卷上

李

爾。依覺故迷。若離覺性，則無不覺。三合

喻合可知。

○二依迷顯覺。

以有不覺妄想心故，能知名義，爲說真覺。若離不覺之心，則無真覺，自相可說。

於中二。初明妄有起淨之功，後明真有待妄之義。夏以依真之妄，方能顯真。隨妄之真，還待妄顯，故也。

○二明枝末不覺。○此一段文，略作二種釋。初約喻說意。二就識釋文。初者，本覺真如，其猶淨眼。熱翳

之氣如根本無明翳，與眼合動，彼淨眼業識亦爾。由淨眼動故，有病眼起，能見相亦爾。以有病眼，向外觀故，卽見空華。妄境界現，境界相亦爾。以有空華境故，令其起心，分別好華惡華等，智相亦爾。由此分別，堅執不改，相續相亦爾。由執定故，於違順境，取捨追求，執取相亦爾。由取相故，於其相上，復立名字。若彼相未對之時，但聞名卽執，計名字相亦爾。既計名取相，發動身口，攀此空華，造善惡業，起業相亦爾。受苦樂報，長眠生死，而不能脫業繫苦相亦爾。皆由根本無明力也。○二釋文。二初無明爲

起信論疏卷上

空

因生三細二境界爲緣生六相

○初無明爲因生三細。二初總標。

○初總標。

復次，依不覺故，生三種相，與彼不覺相應，不離相，不離體故。末不離本故，依無明起妄心，依妄心

起無明故。

○二別解。二初微。

○初微。

云何爲三。

總徵。

○二釋。初業相。二轉相。三現相。

○初業相。

一者無明業相。以依不覺故。心動說名爲業。覺則不動。動則有苦。果不離因故。

初句標名。依不覺故。釋標中無明也。卽根本無明。心動爲業。釋標中業也。此中業有二義。一動作是業義。卽此心動是也。覺則不動者。反舉釋成。旣得始覺時。卽無動念。是知今動只由不覺也。二爲因是業義。動則有苦。此旣招苦。卽爲因也。如得寂靜無念之時。卽是涅槃妙樂。故知今動。則有生死苦患也。

慧信論疏卷上

奎

果不離因者。不動旣樂。卽知動必有苦。動因苦果。旣無別時。故云不離也。此雖動念。而極微細。緣起一相。能所不分。卽當黎耶自體分也。如無相論云。問。此識何相何境界。答。相及境界。不可分別。一體無異。當知此約賴耶業相義說也。下二約本識見相二分爲二。

○二轉相。

二者能見相。以依動故能見。不動則無見。

初句標也。卽是轉相。依前業識。動轉成能見。若依性淨門。動則無能見也。反顯能見。必依動義。如是

轉相。雖有能緣。以境界微細故。猶未辨之。如攝論云。意識緣三世境。及非三世境。是卽可知。此識所緣境。不可知故。旣云所緣不可知。卽約能緣。以明本識轉相義也。

○三現相。

三者境界相。以依能見故。境界妄現。離見則無境界。初句標也。卽是現相。依前轉相。能現境界也。離見無境。反釋可知。

○二境界爲緣生六麤。○卽分別事識也。如楞伽經云。境界風所動。種種諸識浪。此之謂也。問。三細屬

慧信論疏卷上

畜

賴耶。六麤屬意識。何故不說末那識耶。答。有二義。意。一前旣說賴耶。末那必執相應。故不說。瑜伽論云。賴耶識起。必二識相應故。又由意識緣外境時。必內依末那爲染污根。方得生起。是故旣說六麤。必內依末那故。亦不別說。二以義不便故。略不說之。不便相者。以無明住地。動本靜心。令起和合成。黎耶。末那旣無此義。故前三細中略不說。又由外境牽起事識。末那無緣外境義。故六麤中亦略不說。亦可計內爲我。屬前三細。計外爲我所。屬後六麤。故略不論也。楞伽經中。亦同此說。故彼經云。大

慧略說有三種識廣說有八種相何等爲三謂眞識現識分別事識乃至廣說經中現識卽是三細中現相也分別事識卽是下六麤也所以知者彼經下釋分別事識中乃云攀緣外境界起前事識等故知事識非是末那此論下文並同此說宜可記之○文中二初躡前總標二立名別釋

○初躡前總標

以有境界緣故復生六種相

○二立名別釋二初微二釋

○初徵

起信論疏卷上

奎

云何爲六

○二釋六初起計二生受三取著四立名五造業六受報

○初起計

一者智相依於境界心起分別愛與不愛故

於前現識所現相上不了自心所現故創起慧數

分別染淨執有定性

○二生受

二者相續相依於智故生其苦樂覺心起念相應不

斷故

謂依前分別愛境起樂受覺不愛境起苦受覺數

數起念相續現前此明自相續也又能起惑潤業引持生死卽令他相續也故下文云住持苦樂等

○三取著

三者執取相依於相續緣念境界住持苦樂心起著

故

住持苦樂以上皆是前相續相也心起著者此

執取相也謂於前苦樂等境不了虛無深起取著

故下文云卽此相續識依諸凡夫取著轉深計我

我所等也

起信論疏卷上

奎

○四立名

四者計名字相依於妄執分別假名言相故

依前顛倒所執相上更立假名是分別故楞伽云

相名常相隨而生諸妄想故云依於妄執等也上來起惑自下造業受報

○五造業

五者起業相依於名字尋名取著造種種業故

謂執相計名依此麤惑發動身口造一切業卽苦

因也

○六受報

六者業繫苦相以依業受報不自在故

業因已成招果必然循環諸道生死長縛

○三結末歸本。二初正釋。二轉釋。

○初正釋。

當知無明能生一切染法。

三細六麤總攝一切染法皆因根本無明不了真如而起。

○二轉釋。

以一切染法皆是不覺相故。

問染法多種差別不同如何根本唯一無明答染法雖多皆是無明之業氣悉是不覺之差別相故

聖僧論疏卷上

七

不異不覺也。

○三雙辨同異。二初標列。二解釋。

○初標列。

復次覺與不覺雙標有二種相也云何爲二微一者同

相二者異相也

○二解釋。二初同。二異。

○初同。三初喻。二合。三引證。

○初喻。

同相者也譬如種種瓦器皆同微塵性相。

同相者染淨二法同以真如爲性真如以此二法

爲相也。瓦器喻染淨法也。器以塵爲性。塵以器爲相。

○二合。

如是无漏無明種種業幻皆同真如性相。

無漏者始本二覺也。無明者本末二不覺也。此二皆有業用顯現而非實有。故云幻。此等合種種器也。同真如性相者。以動真如門作此生滅門中染淨二法更無別體。故云性也。真如亦以此二法爲相。淨相可知。其染相者下文云。但以無明而熏習故。卽有染相。

聖僧論疏卷上

八

○三引證。二初正引。二釋疑。

○初正引。

是故修多羅中依於此義說一切眾生本來常住。入於涅槃菩提之法非可修相。非可作相。畢竟無得。依此同相門如上本末二不覺本來卽真如故說一切眾生自性涅槃不更滅度。故淨名經云。一切眾生卽涅槃相。不復更滅也。依此同相門如上始本二覺卽真如故諸佛菩提非修等也。又前約不覺卽如故眾生舊來入涅槃今約覺智卽真如故諸佛菩提無新得也。非可修相者望前涅槃非是了

因所顯也。非可作相者。望前菩提。非是生因所作也。畢竟無得者。此之二果。性淨本有也。

○二釋疑

亦無色相可見。而有見色相者。唯是隨染業幻所作。非是智色不空之性。以智相無可見故。

疑云。若眾生已入涅槃。更無新滅者。即已同諸佛。何故不能現報化等色身。故下釋云。法性自體。本無色相可見。如何使現色等耶。又疑云。若以法性非是色相可見法。故不現色者。諸佛何故現報化等種種色耶。故下釋云。彼見諸佛種種色等者。並

起信論疏卷上

充

是隨眾生染幻心中。變異顯現。屬後異相門。非此同相門中。本覺智內。有此色等不空之性也。又亦可本覺不空恆沙德中。亦無此色故也。問。何以得知彼法體中無色相耶。下答云。以本覺智。非是可見之法故也。

○二異

異相者。名。如種種瓦器。各各不同。喻也。下合云。如是無漏無明。隨染幻差別。性染幻差別故。

無漏無明。總指也。下別明云。隨染幻差別者。無漏法也。性染幻差別者。是無明法也。以彼無明。迷平

等理是故。其性自是差別。故下文云。如是無明自性差別故也。諸無漏法。順平等性。直論其性。則無差別。但隨染法差別相故。說無漏法有差別耳。如下文中。對業識等差別染法。故說本覺恆沙性德。又由對治彼染法差別。故成始覺萬德差別也。如是染淨。皆是真如隨緣顯現。似有而無體。故通名幻也。

○二釋上生滅因緣

二。初明生滅因緣義。二重顯所依緣體。

○初明生滅因緣義

三。初總標。二總問。三別釋。

○初總標

起信論疏卷上

三

復次。生滅因緣者。所謂眾生。依心意。意識轉故。

牒前以標也。黎耶心體。不守自性。是生滅因。根本無明。熏動心體。是生滅緣。又無明住地。諸染根本。是生滅因。外妄境界。動起識浪。是生滅緣。依是二義。以顯因緣也。諸識生滅。相集而生。故名眾生。而無別體。唯依心體。故言依心。即是黎耶自相心也。能依眾生。是意識。依心體起。故云轉。轉者起也。

○二總問

此義云何。

此心作眾生。義云何。

○三別釋。三。初釋所依心。二釋意轉。三釋意識轉。

○初釋所依心。

以依阿黎耶識說有無明。

黎耶者是上所說心。卽是生滅之因。無明者。於黎耶識二義中。此是不覺義。卽生滅之緣。欲明依此因緣。意識轉故。故言以依等也。上總中略指其因。故但言依心。此別釋中。具顯因緣。故說依心及無明也。問。上說依覺有不覺。由此不覺力故。動彼心體。令起滅和合。方有黎耶業相等識。何故此中說依黎耶有無明乎。答。此有三釋。一。由此黎耶有

起信論疏卷上

主

二種義故。謂由無明動彼真心。成此黎耶。又卽此黎耶。還却與彼無明爲依。以不相離故。何者。謂依迷起似故。卽是動真心成業識。迷似爲實故。卽是依黎耶而有無明也。二云。以黎耶有二義。謂覺不覺。前別就本說。故云依覺有不覺。今就都位論。故云依黎耶有無明也。此卽二義中不覺之義。正在黎耶中。故說依也。三云。此中正意。唯取真心隨緣之義。此隨緣義。難名目故。或就未起說。依真如有無明。或約成就已起說。依黎耶有無明。然此二名。方盡其義。是故文中前後。綺互言耳。

○二釋意轉。三。初略明。二廣辨。三結歸一心。

○初略明。○略明五種識相。

不覺而起。能見。能現。能取境界。起念相續。故說爲意。不覺而起者。所依心體。由無明熏。舉體而動。卽是業識也。前依黎耶有無明。卽依似起迷。今熏淨心成黎耶。卽依迷起似。此二義一時。說有前後耳。能見者。卽彼心體。轉成能見。是轉識也。能現者。卽彼心體。復成能現。卽是現識也。能取境界者。能取現識所現境界。是爲智識也。起念相續者。前所取境起諸麤念。是相續識也。依此五義。次第轉成依止

起信論疏卷上

主

依止此義。而生意識等。故說爲意。故攝論云。意以能生依止爲義也。

○二廣辨。二。初標徵。二列釋。

○初標徵。

此意復有五種名。標也。云何爲五。徵也。

○二列釋。○依名五唱。

一者名爲業識。立名也。下準此。謂無明力。不覺心動故。

根本無明。卽所依緣也。明心不自起。起必由緣。心

動者。正明起相。釋成業義也。起動是業義故。

二者名爲轉識。依於動心。能見相故。

依前業識之動轉成能見之相。轉識有二。若就無明所動。轉成能見者。在本識中。若其境界所動。轉成能見者。在事識中。此中轉相。約初義也。

三者名爲現識。所謂能現一切境界。猶如明鏡。現於色像。現識亦爾。隨其五塵。對至卽現。無有前後。以一切時任運而起。常在前故。

依前轉識之見。起此能現之功。故云現境界。以其心體與無明合。熏習力故。現於種種無邊境界。故也。明鏡現色像。喻可知也。合中且舉五塵麤顯。以合色像。而實通現一切境界。故法說中云一切也。

起信論疏卷上

三

若依瑜伽論中。則現五根種子及器世間等。今此論中。偏就五塵者。以此約牽起分別事識義。故作是說也。一切時任運而起者。非如六七識有時斷滅。故云常在前。又爲諸法本。故明此識在諸法之先。以是諸法所依。故揀異末那識。

四者名爲智識。謂分別染淨法故。

智識則事識內細分。謂不了前心所現境故。起染淨微細分別。故云智識。

五者名爲相續識。以念相應不斷故。

相續識亦是事識中細分。前六相中相續相也。念

不斷者。法執相應。得長相續。此約自體不斷。釋相續義。

住持過去無量世等善惡之業。令不失故。

以此識能起潤業煩惱。能引持過去無明所發諸行善惡業種。令成堪任來果之有。若無惑潤業種。焦亡故也。此則引生令熟。

復能成熟現在未來苦樂等報。無差違故。

又復能起潤生煩惱。能使已熟之業。感報相應。成熟無差。如三世因果流轉。連持不絕。功由意識。以是義故。名相續識。

起信論疏卷上

五

能令現在已經之事。忽然而念。未來之事。不覺妄慮。顯此識用麤分別相。不同智識微細分別故也。○此上所解。但屬此相續識。約其功能。釋相續義。又爲一解。從住持下。總辨前五意功能。初住持業果。是前三細功能。屬黎耶。後念已未之境。是後二功能。屬事識細分。

○三結歸一心。初二結屬心。二釋疑廣辨。

○初正結屬心。○曲分二段。

是故三界虛僞。唯心所作。

一順結三界。是前一心。隨無明動作五種識故。故

說三界唯心轉也。此心隨熏現似曰虛。隱其虛體。詐現實狀曰偽。虛偽之狀。雖有種種。然窮其因緣。唯心所作也。十地經中亦同此也。

離心則無六塵境界。

二反結六塵。離彼現識。則無塵境。反驗六塵。唯是一心。

○二釋疑廣辨。分三。初問。二答。三結。

○初問。

此義云何。

現有塵境云何唯心。

起信論疏卷上

圭

○二答。

以一切法皆從心起。妄念而生。一切分別。卽分別自心。心不見心。無相可得。

以一切法皆是此心。隨熏所起。更無異體。故說唯心。又疑云。何以此心作諸法耶。故下釋云。由妄念熏故。生起諸法。又亦可疑云。法既唯心。我何不見。而我所見唯是異心。釋云。言異心者。是汝妄念分別而作也。境唯識現。無外實法。是故分別。但分別自心。此一句。顯無塵唯識義。爾。心不見心者。既塵無相。識不自緣。是故無塵識不生也。無相可得者。

能所俱寂也。攝論云。無有少法能取少法。

○三結。

當知世間一切境界。皆依眾生無明妄心而得。住持是故。一切法。如鏡中像。無體可得。唯心虛妄。以心生則種種法生。心滅則種種法滅。故。

無明根本也。妄心業識也。以一切境界由此而成。卽現識等也。若無明未盡。以還。此識住持境界不息。此卽結相屬心也。鏡像喻況也。此境離心之外。無體。又卽心故。無體。如像離鏡之外。無形。鏡內復無其體。又疑云。既其無體。何以宛然顯現。故下釋。

起信論疏卷上

圭

云。唯心此並真心之上。虛妄顯現。何處有體而可得耶。問。何以得知心上顯現。下答云。以心生法生。心滅法滅。故。

反驗唯心。顯現成妄也。以心生法生等。故知也。此中以無明力。不覺心動。乃至能現一切境等。故言心生種種法生。此則心隨熏動。故云生也。若無明滅。境界隨滅。諸識分別。皆滅無餘。故言心滅則種種法滅。此則心源還淨。故云滅也。既心隨不覺。妄現諸境。卽驗諸境。唯心無體也。問。上說生滅。結過屬無明。此文辨因緣。云何結屬心耶。答。前以無明動彼靜心。令其生滅。故此生滅。功在無明。今此因。

緣和合道理。成辦諸法。無性義顯。不住義彰。故結和合屬於心也。

○三釋意識轉。五。初約人辨粗。二出其惑體。三明執所依緣。四制立其名。五識起所依。

○初約人辨麤。

復次言意識者。牒前以標卽此相續識。依諸凡夫。取著轉深。

此生起識。麤細雖殊。同是一識。更無別體。故卽指前第五識也。但前就細分法。執分別相應。依止義門。則說爲意。此中約其能起見愛麤惑相應。從前起門說。名爲意識。謂意之識。故名意識。凡夫者。簡

起信論疏卷上

七

非聖人意識也。以前智識及相續識。通在二乘及地前所起。故今約凡顯其麤也。取著者。以無對治故。追著妄境。轉極麤現。故云深也。

○二出其惑體。

計我我所。種種妄執。

非直心外計境爲塵。亦復於身計我於塵計所也。妄執者。顯計我之相也。或執卽蘊。或執離蘊。

○三明執所依緣。

隨事攀緣。分別六塵。

但緣於倒境之事。不了正理。故云隨事等。

○四制立其名。

名爲意識。亦名分離識。又復說名分別事識。

此論就一意識義。分出五識。故說意識分別六塵也。分離者。依於六根。別別取六塵故。分別事識者。又能分別去來內外種種事相故。

○五明識起所依。

此識依見愛煩惱增長義故。

見。謂見一處住地。卽見道惑。愛。謂欲色有三愛。卽修惑。以此見修二惑。熏於本識。令生此分別事識。故云增長。上六麤中。執取計名。及起業相。並相

起信論疏卷上

七

從入此意識中。及後六染中。執相應染。亦入此攝也。

○二重顯所依緣體。二。初略明緣起甚深。二。廣顯緣起差別。

○初略明緣起甚深。二。初標歎甚深。二。釋甚深所以。

○初標歎甚深。

依無明熏習所起識者。

牒上所說。依根本無明。起彼靜心。成業等識也。

非凡夫能知。亦非二乘智慧所覺。

凡小非分也。二乘但覺四住。不了無明。故此無明所起之識。非其境也。下明菩薩分知云。

謂依菩薩從初正信發心觀察。若證法身得少分知。乃至菩薩究竟地。不能盡知。唯佛窮了。

十信之初發心之時。卽觀本識自性緣起因果之體。得成正信也。三賢位中並言比觀。故云觀察菩薩不能盡知者。地上證之未窮故。以其但覺住相。不覺生相也。唯佛窮了者。四相俱了。故得窮源。

○二釋甚深所以。二初微。

○初徵。

何以故。

緣起妙理。貫通凡聖。何故說見唯在果人。

起信論疏卷上

无

○二釋。初卽淨而染。二卽染常淨。三結成難測。

○初卽淨而染。

是心從本已來。自性清淨。一而有無明。二爲無明所染。有其染心。三

一。緣起體。淨卽因也。二發緣起之由。無卽緣也。三

顯緣起之相。有其染心卽不染而染也。

○二卽染常淨。

雖有染心。而常恆不變。

釋緣起甚深義。卽染而不染也。

○三結成難測。

是故此義。唯佛能知。

勝鬘經云。自性清淨心。難可了知。彼心爲煩惱所染。亦難可了知。乃至結云。唯佛能知。楞伽經中亦同此說。故彼經云。如來藏是清淨相。客塵煩惱。垢染不淨。乃至廣說。下結云。我今與汝。及諸菩薩甚深智者。能了分別也。

○二廣顯緣起差別。二初顯前緣起體相。二更重料揀。

○初顯前緣起體相。三初顯上不變之義。一顯無明緣起之由。三顯上緣起之相。

○初顯上不變之義。

所謂心性常無念故。名爲不變。

起信論疏卷上

全

雖舉體動而本來靜。故云常無念。顯上緣起因體也。

○二顯上無明緣起之由。

以不達一法界故。心不相應。忽然念起。名爲無明。

此顯根本無明。最極微細。未有能所。王數差別。卽

心之惑。故云不相應。非同心。王心數相應。唯此無

明爲染法之源。最極微細。更無染法。能爲此本。故

云忽然念起也。如纓絡本業經云。四住地前使無

法起故。名無始無明住地。是則明其無明之前。無

別有法爲始集之本。故云無始。卽是此論忽然義。

也。此約麤細相依之門。說爲無前。亦言忽然。不約時節。以說忽然也。

○三顯上緣起之相。○謂有其染心之句也。三。初標。二徵。三釋。

○初標。

染心者。有六種。

○二徵。

云何爲六。

六中各二。初障。後治。

○三釋。○然此六染。逆次配六麤前四。及後三細。由

起信論疏卷上

全

此第一。合彼麤中三四。故但六也。便借此名以科

此六。

初執取計名字相。二相續相。三智相。四境界相。五能見相。六無明業相。

○初執取計名字相。

一者執相應染。依二乘解脫。及信相應地。遠離故。

是六麤中第三第四相也。亦是上意識見愛煩惱

所增長義。亦是上四相中麤。分別執著相也。但麤

心外執。與境相應。污其淨行。故云染也。二乘解脫

至無學位。見修煩惱。究竟離也。信相應者。十解以

去。信根成就。無有退失。名信相應。故地論云。地前

總名信行地菩薩。無著論中。亦同此說也。此菩薩

得人空。見修煩惱。不得現行。故云遠離。非約隨眠。以留惑故。故攝論云。若不斷上心。則不異凡夫。若不留惑種子。則不異二乘。又二意。留惑爲自他也。此約終教說。若約始教。初地以上。方說留惑。如餘論說。今此菩薩。非直斷四住人執。亦分斷無明住地。故此論下云。不了一法界義者。從信相應地。觀察學斷故。今但爲顯人我麤執。故不論彼也。

○二相續相。

二者不斷相應染。依信相應地。修學方便。漸漸能捨。得淨心地。究竟離故。

起信論疏卷上

全

六麤中第二也。從此至六。又逆配前五意中。此位

第五。但執法續生。生起不斷。卽是相續義也。十解

以去。修唯識觀。尋伺方便。乃至初地。證三無性。徧

滿真如。法執分別。不得現行。

○三智相。

三者分別智相應染。依具戒地。地二漸離。乃至無相方

便地。地七究竟離故。

六中第一。五中第四。以能分別世出世諸法染淨。

故云智也。是法執修惑。七地以還。有出入觀異故。

於境界。有微細分別。然地地分除。故云漸離。八地

以去。無出觀緣境。故於七地盡此惑也。故云無相方便地。究竟離也。以二地三聚戒具。故云具戒地。以七地前無相觀。有加行方便。有功用。故云無相方便地。以八地以上。無相無方便功用。故

○四境界相。

四者現色不相應染。依色自在。地能離故。

三細五意中。皆當第三。此即依根本無明。動彼淨心。令現境界也。色自在。地者。以八地中。得三種世間自在。色性隨心。無有隔礙。故云色自在。地能離也。以色不自在。位現識不亡。故此位中。遣彼相也。

起信論疏卷上

全

○五能見相。

五者能見心。不相應染。依心自在。地能離故。

三中五中。皆當第二。以根本無明。動令能見。上文云。依於動心。成能見。故心自在。地者。以九地中。善知眾生心行十種稠林。故云心自在。此於他心得自在。又以自得四十無礙智。出華嚴經。有礙能緣。永不得起。

○六業相。

六者根本業。不相應染。依菩薩盡地。得入如來地。能離故。

三中五中。皆當第一。以無明力。不覺心動。故十地終心。金剛喻定。無垢地中。微細習氣。心念都盡。故上文云。得見心性。心則常住。故。

○二更重料揀。三。約境成。二礙義。
初辨上無明。約治料揀。二釋上相。應不相應義。三舉上染心及無明。

○初辨上無明。約治料揀。

不了一法界義者。標從信相應地。觀察學斷。入淨心地。隨分得離。乃至如來地。能究竟離故。

初麤者。至初地離。後細者。至佛地盡。故也。此即是上染心。所依無明住地。能染真如。成染心故。上文

起信論疏卷上

全

云。破和合識者。滅無明故。滅相續心者。斷染心故。今無明與染心。雖說有前後。然治滅並一時也。

○二釋上相應不相應義。

言相應義者。謂心念法異。依染淨差別。而知相緣相同故。

六染中前三是相應。此有二釋。一約王數釋。此三種皆是麤心故。二約心境釋。以此三種依境生。故心謂心王。念法謂心所。王數不同。故云異也。迦旃延論中。名為心及心所念法故。又心念謂能緣心。法謂所緣境。異謂心境不同也。染淨差別者。是所

依分別境也。同者若心王知染心法亦同心王緣淨心法亦同。知相即能知同緣相即所緣同。又於染境作染解。於淨境作淨解。故云同也。

不相應義者。謂即心不覺常無別異。不同知相緣相故。

六染中後三及無明皆名不相應心。亦二釋。一約王數釋。此顯根本無明動彼靜心之體。即此動心是不覺相。更無王數之別。故云即心不覺。常無別異。此翻前心念法異也。既無王數之別。何有同知同緣。翻前可見。以此三種依不覺起。不異不覺。故

起信論疏卷上

金

云即也。上文云依不覺故生三種相。與彼不覺不相捨離者。是此即心之不覺。故云不離。非是相應而不離也。下文亦云無明滅故不相應心滅。二亦約心境釋中言即心不覺等者。謂此無明即此染心。而無別體。不約與外境相應。方為此不覺。但在本心之上。故云即心等也。不同知相等者。揀前相應也。此不相應心。既是染耶識。於中不分王數義。及不與外境相應義。并有覺不覺義等。並與諸論相違。和會如別記中說。

○三舉上染心及無明約境成二礙義。二。初標立。二重釋。

○初標立。○初惑障後智障。又染心義者。名為煩惱礙。能障真如根本智故。無明義者。名為智礙。能障世間自然業智故。

染心者。六染心也。能障真如下顯其礙義。謂照寂妙慧。如理之智。名根本智。即上文智淨相也。染心誼動。違此寂靜。故名染心。為煩惱礙。以煩惱動故。今此且依本末相依門。以無明所起染心。為煩惱礙。能起染心之無明。名為智礙。不約人法二執以明二礙也。無明者。根本無明也。能障世間下顯其礙義。謂後得如量智。即上不思議業用也。以無明

起信論疏卷上

金

昏迷。無所分別。違此智用。名為智礙。從所障得名也。自然業智者。此明聖智用。如月頓應於水。無心不同。外道自然。

○二重釋。二。初釋煩惱礙。

○初釋煩惱礙。

此義云何。

先問云。既此無明動靜心體成於染心。則無明是細。應障理智。染心是麤。應障量智。何以不然。以依染心能見能現。妄取境界。違平等性故。

染心能見能現者。獨約後三細前二染也。妄取境

界者通攝前三染心。以同依境起故。違平等性者。釋成礙義也。以此染心。能所差別。乖根本智能所平等。所以障於理智。

○二釋智礙。

以一切法常靜。無有起相。無明不覺。妄與法違。故不能得隨順世間一切境界種種知故。

一切法者。舉無明所迷法性也。與法違者。正顯無明迷前法性。以不了如法寂靜。妄有起滅。與法乖違。故也不能隨順下。正釋障如量智義也。

○三釋上生滅之相。三。初牒前標數。二徵列略顯三廣釋其相。

起信論疏卷上

七

○初牒前標數。

復次。分別生滅相者。牒前有二種。標數。

○二徵列略顯。

云何爲二。徵一者麤。與心相應故。二者細。與心不相應故。

六染中。前三染。是心相應。其相麤顯。經中說爲相生滅。後三染。是心不相應。以無心法麤顯之相。其體微細。經中說爲流注生滅。

○二廣釋其相。二。初約人對顯。二辨相所依。

○初約人對顯。

又麤中之麤。凡夫境界。麤中之細。及細中之麤。菩薩境界。細中之細。是佛境界。

前三染心。俱名爲麤。於中初執相應染。復更爲麤。三賢位名內凡。能覺此染故。又於三麤染中。後二謂不斷相應染。及分別智相應染。是麤中稍細。後三染心。俱名爲細。於中前二。謂能見能現是也。同是不相應。故名爲細。形後根本業識。故復云麤。十地以還。菩薩所知境也。細中之細者。根本業不相應染。能所未分。行相極細。故唯佛了。

○二辨相所依。二。初順辨生緣。二逆論滅義。

起信論疏卷上

八

○初順辨生緣。○初明通緣。後顯別因。

此二種生滅。依於無明熏習而有。所謂依因依緣。依因者。不覺義故。依緣者。妄作境界義故。

通而言之。麤細二識。皆依無明住地而起。以根本無明。動起三細。依此三細。轉起麤心。故以無明通爲其本。若別而言之。依無明因。生三細。不相應心。依境界緣。生三麤。相應心。故也。此中文少。若具說之。各有二因。如楞伽云。大慧。不思議熏。不思議變。是現識因。取種種塵。及無始妄想熏。是分別事識因。解云。不思議熏者。謂無明能熏真如。不可熏處。

而能熏。故名不思議熏。又熏卽不熏。不熏之熏。名
不思議熏。不思議變者。謂真如心。受無明熏。不可
變異而變異。故云不思議變。又變卽不變。不變之
變。名不思議變。勝鬘中。不染而染。染而不染。難可
了知者。謂此不思議也。然此熏變。甚微且隱。故所
起現識。行相微細。於中亦有轉識業識。舉麤顯細。
故但名現識。卽是此不相應心也。取種種塵者。卽
是現識所現種種境界。還能動彼心海。起諸事識
之浪。故也。無始妄想熏者。卽彼和合心海之中。妄
念習氣。無始以來。熏習不斷。未曾離念。故此塵及

起信論疏卷上

全

念。熏動心海。種種識生。以妄念及塵。麤而且顯。故
所起分別事識。行相麤顯。成相應心也。經中欲明
現識。依不思議熏。故得生。依不思議變。故得住。事
識依境界。故得生。依心海。故得住。今此論中。但說
生緣。不論依住。是故於細中。唯說無明熏。麤中單
舉境界緣也。

○二逆論滅義。二。初正辨。二釋疑。

○初正辨。

若因滅則緣滅。因滅故不相應心滅。緣滅故相應心
滅。

得對治無明滅時。無明所起現識境界亦隨滅。此
初通明滅也。下別顯因滅緣滅云。以三細親依無
明因生。故無明滅時。亦隨滅也。以三麤染親依境
界緣生。故境界滅時。亦隨滅也。此依始終起盡道
理。以明二種生滅之義。非約剎那生滅義也。

○二釋疑。二。初問。二答。

○初問。

問曰。若心滅者。云何相續。若相續者。云何說究竟滅。
若境界滅時。心體亦滅者。無明三細。既其未盡。心
體已亡。更依何法而得相續。此疑相應心也。若言

起信論疏卷上

全

以心體不滅。令無明相續者。心體既其不滅。無明
則常相續。云何治道得究竟滅。此疑不相應心也。
答中雙答此二也。

○二答。三。初法。二喻。三合。

○初法。

答曰。所言滅者。唯心相滅。非心體滅。

境界滅時。唯心麤相滅。非心自體滅。又以無明滅
時。唯心細相滅。亦非心體滅。此通答二問。下喻合
則別說。

○二喻。

如風依水而有動相。若水滅者。則風相斷絕。無所依止。以水不滅。風相相續。唯風滅故。動相隨滅。非是水滅。

喻無明風依心體水。故有動相。此示無明離於心體。不能自現動相也。若水滅者下。此示若境界滅時。令心體亦滅者。則無明風無所動故。業等三細。則應斷絕也。以境界滅時。心體不滅。故無明三細。則得長相續。良以無明滅。故境界滅。非以境界滅。故無明滅。由是義故。境界滅時。無明動心。三細相續。此答初問相應心滅義也。唯風滅下。以無明盡。

起信論疏卷上

全

時。業等動相亦隨之滅。非靜心體而亦滅也。此答後問不相應心滅義也。合中次第合前二種心云。○三合。

無明亦爾。依心體而動。若心體滅者。則眾生斷絕。無所依止。以體不滅。心得相續。唯癡滅故。心相隨滅。非心智滅。

上文以對不覺。故名爲覺。則一識有二義。今以對癡。故名爲智。則一心有體相。不覺癡相轉滅。成於始覺。則本覺不滅。與始覺還源。無二無別也。

大乘起信論疏卷上

大乘起信論疏卷下

○二辨染淨相資。○亦云染淨互熏相生不

上總中能生一切法義也。四初舉數總標。二徵列別名。三廣釋染淨熏

習之義。四明染淨盡不盡義。

○初舉數總標。

復次有四種法熏習義故。染法淨法起不斷絕。

由此染淨相資故得起不斷絕也。

○二徵列別名。

云何爲四。徵一者淨法名爲真如。二者一切染因名

爲無明。三者妄心名爲業識。四者妄境界。所謂六塵。

起信論疏卷下

十一

此是生滅門中真如以三義故。故云淨法。一約體

本來淨故。二約體相以內熏故。令反染成始淨故。

梁攝論云。能成立者。謂真如十種功德所成立者。

謂十種新生正行也。三約用熏故。應機成淨緣也。

染因者。六染及九相。皆因無明而有也。妄心者。通

事識及業識。今據其本。故但言業識也。妄境界者。

事識所緣之境也。此三皆是染法。由此染法。自性

差別。仗託因緣。故具說三種淨法對染。雖成熏義。

然其體用。竟未曾別。故但明一種。

○三廣釋染淨熏習之義。二初總。二別。

○初總。二初喻。

○初喻。

熏習義者。如世間衣服。實無於香。若人以香而熏習

故。則有香氣。

喻也。下合有二。

○二合。

此亦如是。真如淨法。實無於染。但以無明而熏習故。

則有染相。無明染法。實無淨業。但以真如而熏習故。

則有淨用。

合有二。一染熏淨也。顯真無相。隨熏現相。又顯妄

起信論疏卷下

十二

法無體。故但云相。又當相自無反流之用。故云相

不云用也。此約隨流生滅門說。此釋經中如來藏

爲惡習所熏等也。二淨熏染也。此是生滅門中本

覺真如。故有熏義。真如門中。則無此義。由此本覺

內熏不覺。令成厭求。反流順真。故云用也。此釋經

中由有如來藏故。能厭生死苦。樂求涅槃也。涅槃

經云。闡提之人。未來佛性力故。還生善根。彼言佛

性力者。卽此本覺內熏之力耳。良以一識含此二

義。更互相熏。徧生染淨故也。此中佛者是覺。性者

是本。故名佛性爲本覺也。

○二別。二初染。二淨。

○初染。二初問。二答。

○初問。

云何熏習起染法不斷。

泛論熏習各二種。一習熏。謂熏心體成染淨等。二資熏。謂現行心境及諸惑相資等。

○二答。二初略。二廣。

○初略。

所謂以依真如法故。有於無明。以有無明染法。因故。即熏習真如。以熏習故。則有妄心。以有妄心。即熏習

起信論疏卷下

三

無明。不了真如法故。不覺念起。現妄境界。以有妄境界染法緣故。即熏習妄心。令其念著。造種種業。受於一切身心等苦。

依真如有無明者。舉能熏所熏之法體也。亦可此中但舉能熏無明。然必依真如。故約本舉也。以有無明染法。因故。根本無明熏習義也。依無明熏動真如。有業識心也。以此妄心。還資熏無明。增其不了。令其轉成轉識及現識。以此境界。還熏動心海。起諸識浪。緣念彼境。即起事識也。上六麤中。初二名念。中二名著。後二名同此也。謂依惑造業。依業

受報。

○二廣。○即明前三種從後向前。次第說也。文三。明境界熏妄心。二明妄心熏無明。三明無明熏真如。

○初明境界熏妄心。

此妄境界熏習義。則有二種。云何為二。一者增長念熏習。二者增長取熏習。

念者。由境界力。增長事識中智相。相續相。法執分別念也。取者。增長事識中執取相。計名字相。謂人我見愛煩惱也。

○二明妄心熏無明。

起信論疏卷下

四

妄心熏習義有二種。云何為二。一者業識根本熏習。能受阿羅漢辟支佛一切菩薩生滅苦故。二者增長分別事識熏習。能受凡夫業繫苦故。

一者。以此業識。能資熏住地無明。迷於無相。能起轉相現相等相續。令彼三乘人。雖出三界。離事識分段麤苦。猶受黎耶變易細苦。然此細苦。無始來有。但為揀細異麤。故約已離麤苦時。相顯處說也。二者。以事識能資熏起時無明。起見愛麤惑發動身口。造種種業。受凡夫分段苦故。

○三明無明熏真如。

無明熏習義有二種。云何爲二。一者根本熏習。以能成就業識義故。二者所起見愛熏習。以能成就分別事識義故。

一者謂根本不覺熏動真如。成業等諸識。但今舉初故云業識也。二者謂枝末不覺熏習心體。成分別事識。上文云。此識依見愛煩惱增長義故。但未從本生故云所起也。

○二淨。二初問。二答。

○初問。

云何熏習起淨法不斷。

起信論疏卷下

五

○二答。二初略。二廣。

○初略。二初正明熏習。二辨其功能。

○初正明熏習。

所謂以有真如法故。能熏習無明。以熏習因緣力故。則令妄心厭生死苦。樂求涅槃。以此妄心有厭求因緣故。卽熏習真如。

先明真如內熏無明。令成淨業。後卽此淨用。反熏真如。增其勢力。前卽本熏。後卽新熏也。

○二辨其功能。二初因。二果。

○初因。

自信己性。知心妄動。無前境界。修遠離法。以如實知無前境界故。種種方便起隨順行。不取不念。乃至久遠熏習力故。

自信己性者。十信位中信也。知心妄動以下。卽三賢位中修。知心妄動無境者。解也。修遠離法者。依解成行。謂尋伺等觀。唯識無塵等行也。如實知者。初地見道。證唯識理。異前比觀。故云如實也。種種方便以下。明十地修道位中。廣修萬行。以顯真如云。不取者。所取無相也。不念者。能念不生也。久遠者。三祇熏故。

起信論疏卷下

六

○二果。

無明則滅。以無明滅故。心無有起。以無起故。境界隨滅。以因緣俱滅故。心相皆盡。名得涅槃。成自然業。

無明者。根本也。心無起者。妄心盡也。境界隨滅者。妄境滅也。此上皆滅惑也。卽翻前三種染法。以下明證理成德云。因者無明也。緣者妄境界也。心相者染心也。此並滅故。心體轉依。名得涅槃。起不思議業用。

○二廣。二初明妄心熏習。二顯真如熏習。

○初明妄心熏習。

妄心熏習義有二種云何爲二一者分別事識熏習依諸凡夫二乘人等厭生死苦隨力所能以漸趣向無上道故二者意熏習謂諸菩薩發心勇猛速趣涅槃故

一分別事識者卽上意識以此識不知諸塵唯是識故執心外實有境界凡夫二乘雖有發心趣向解脫而猶計有生死可厭涅槃可欣不了唯心道理由此作意力故久後還得菩提也二意者若就本而言名爲業識通而論之卽前五種意也菩薩發心者以諸菩薩知一切法唯是識量捨彼事識

起信論疏卷下

七

外計分別既了唯心趣理速疾異前漸悟故云乃至速趣涅槃也問此中妄心既並熏習真如起反流行意熏既屬黎耶如何能各自發心修行答前凡夫二乘不覺黎耶但依分別事識資持力故而發心修行以不達本故向大菩提疎而且遠故云漸也此菩薩既了黎耶本識卽依此識資持力故方得發心修行以了本故向大菩提親而且近故云速也此約所依相資辨熏非各自發心等此如下文證發心中說也

○二顯真如熏習二初標數二徵

○初標數

真如熏習義有二種

○二徵列

云何爲二二者自體相熏習內二者用熏習外

○三辨相二初別釋

○初別釋二初體相二初用大

○初體相二初正顯二初釋疑

○初正顯

自體相熏習者從無始世來具無漏法備有不思議業作境界之性依此二義恆常熏習以有力故能令

起信論疏卷下

八

眾生厭生死苦樂求涅槃自信己身有真如法發心修行

不空本覺名無漏法此法冥熏眾生非物能了故云不思議此中業者是冥熏作用也作境界性者非直熏彼妄心令其厭求成能觀智亦乃與其觀智作所觀境界也依此二義下顯熏功能二義謂此心境二法也可此體相二法冥熏眾生有力故令起厭求等行也自信己性下依熏起修行相也

○二釋疑二初問二答

○初問。

問曰。若如是義者。一切眾生悉有真如。等皆熏習。云何有信無信。無量前後差別。皆應一時自知有真如法。勤修方便。等入涅槃。

初約現在信心有無。後約未來信心前後。內熏既齊。何得如是。皆應一時下。結成難也。此則執別疑通難。

○二答。二。初約染惑成緣。明起有厚薄。二約淨法賴緣。成前後差異。

○初約染惑成緣。明起有厚薄。

答曰。真如本一。而有無量無邊無明。從本以來。自性

起信論疏卷下

九

差別。厚薄不同。故過恆河沙等上煩惱。依無明起差別。我見愛染煩惱。依無明起差別。如是一切煩惱。依於無明所起。前後無量差別。唯如來能知故。

真如本一者。通體明內熏不無也。而有無明者。謂根本無明住地。本來自性差別。隨人厚薄。厚者不信。薄者有信。前後亦爾。非彼內熏使之然也。恆沙等上煩惱者。枝末是根本上也。是從無明所起。迷諸法門事中無知。所知障中麤分攝也。我見愛染煩惱者。是無明所起。四住煩惱。煩惱障攝也。下云。如是一切煩惱者。雙結前二種煩惱。皆依根本無

明所起。由是義故。前後非一。差別無量。前後難知。故唯佛了。

○二約淨法賴緣。成前後差異。二。初立理。二正釋。

○初立理。

又諸佛法。有因有緣。因緣具足。乃得成辦。

若獨內因。不假外緣。可如所責。然今外假用熏。及內正因。方得成辦。故致前後不可一時。故上開二

熏習。不云一也。

○二正釋。二。初明因緣互闕之失。二明性用相應之得。

○初明因緣互闕之失。二。初顯闕緣之失。二明闕因不成。

起信論疏卷下

十

○初顯闕緣之失。二。初喻說。二法合。

○初喻說。

如木中火性。是火正因。若無人知。不假方便。能自燒木。無有是處。

○二法合。

眾生也。亦爾。雖有正因熏習之力。火性若不遇諸佛菩薩善知識等。若無人以之為緣。能自斷煩惱。能自入涅槃者。則無是處。

涅槃者。則無是處。

○二明闕因不成。

若雖有外緣之力。而內淨法未有熏習力者。亦不能

究竟厭生死苦樂求涅槃。

謂無明厚重之流。雖本覺內熏。然未有力故。雖遇善友外緣之力。亦不能令其得道。

○二明性用相應之得。

若因緣具足者。所謂自有熏習之力。又為諸佛菩薩等慈悲願護故。具因緣也。下明熏益云。能起厭苦之心。信有涅槃。修習善根。自勝進云。以修善根成熟故。則值諸佛菩薩。示教利喜。乃能進趣。向涅槃道。

示教利喜。示者示義也。教者教行也。既得義利。具解行。故成喜。

起信論疏卷下

十二

○二用大。二初指事總標。二約緣別顯。

○初指事總標。

用熏習者。即是眾生外緣之力。

○二約緣別顯。三初標。二徵列。三釋。

○初標。

如是外緣有無量義。略說二種。

○二徵列。

云何為二。一者差別緣。二者平等緣。

一者為於凡小事識熏習而作於緣。謂現形不同故云也。亦可與差別機為緣故也。謂三賢以上。乃

至諸佛。能作此緣。應眾生也。二者為諸菩薩業識熏習而作於緣。謂唯現佛身。平等無二。故云也。亦可與平等心機為緣故也。謂初地以上。乃至諸佛。要依同體智力。能作此緣。

○三釋。二初差別緣。二平等緣。

○初差別緣。二初總。二別。

○初總。二初明感用因。二正明用相。

○初明感用因。

差別緣者。此人依於諸佛菩薩等。從初發意。始求道時。乃至得佛。於中若見若念。

起信論疏卷下

十三

此人。謂機欲之人也。諸佛菩薩等。出外緣體也。發意求道者。明能感緣機修行時也。若見若念。正明行者之心。感用器也。謂見其身形。念其功德也。

○二正明用相。二初正明差別之用。二辨用之益。

○初正明差別之用。二初開總成別。二攝別成總。

○初開總成別。

或為眷屬父母諸親。或為給使。或為知友。或為冤家。或起四攝。

一慈愛以攝生。二居卑以利物。三同類以勸發。四怖之以入道。五以四攝法攝之。

○二攝別成總

乃至一切所作。無量行緣。

○二辨用之益。

以起大悲熏習之力。能令眾生增長善根。若見若聞。得利益故。

○二別。二。初就根熟不熟。開遠近二緣。二就前近遠。各開爲二。

○初就根熟不熟。開遠近二緣。

此緣有二種。云何爲二。一者近緣。速得度故。二者遠緣。久遠得度故。

○二就前近遠。各開爲二。

起信論疏卷下

三

是近遠二緣。分別復有二種。云何爲二。二者增長行緣。二者受道緣。

一。謂方便行。卽自分也。二。謂依前方便。正觀相應。卽勝進也。亦可初卽四攝。利他行。後卽三空。自利行。

○二平等緣。二。初明能作緣者平等。二明對機顯平等。

○初明能作緣者平等。

平等緣者。一切諸佛菩薩。皆願度脫一切眾生。平等心也。自然熏習。常恆不捨。常用應機。以同體智力故。常用隨應。見聞而現作業。顯其用相。

○二明對機顯平等。

所謂眾生依於三昧。乃得平等見諸佛故。

謂十住以去。依三昧力。悉見諸佛身量平等。無有彼此分齊之相。

○二合明。三。初標。二徵。二釋。

○初標。

此體用熏習。分別復有二種。

○二徵。

云何爲二。

○三釋。○依論二唱。

起信論疏卷下

四

一者未相應。謂凡夫二乘。初發意菩薩等。以意識熏習。依信力故。而能修行。未得無分別心。與體相應故。未得自在業修行。與用相應故。

凡夫二乘。初發意菩薩等。約位舉人也。以意識熏習者。明其行劣也。凡小意識熏。菩薩五意熏。並未契真如故。未得無分別心下。正明未相應云。無正體智故。未與法身體相應也。無證真後得智故。未與應化身用相應也。

二者已相應。謂法身菩薩。得無分別心。與諸佛智用相應。唯依法力。自然修行。熏習真如。滅無明故。

法身菩薩顯位也。得無分別心者。如理智與體相應也。與諸佛智用相應者。以有如量智。故得然也。唯依法力下。約行勝翻前劣云。法力者。證真如而修行。非如前位。但有信力也。自然修行者。八地以去。無功用行也。滅無明者。妄滅行成也。

○四明染淨盡不盡義。二初明染法違真。無始有終。二明淨法順理。有始無終。

○初明染法違真。無始有終。
復次。染法從無始以來。熏習不斷。乃至得佛。後則有斷。

○二明淨法順理。有始無終。分二

起信論疏卷下

五

淨法熏習。則無有斷。盡於未來。一此義云何。以真如法。常熏習故。妄心則滅。法身顯現。起用熏習。故無有斷。二

一正顯。二釋成也。以真熏妄滅。淨用無盡故。

○二辨所示之義。○即明前法有顯義功能。問。何故真如門中。不辨所示義。生滅門中。具辨所示三大義耶。答。以真如門中。即示大乘體。能所不分。詮旨不別。故不別辨。生滅門中。染淨不一。法義有殊。故具說三。上立義分中。真如門內云。即示生滅門中。示能示。釋義在此也。文二。初體相二大。二別解用大。

○初釋體相二大。二初總標大名。二別釋大義。

○初總標二大名。

復次。真如自體。體相者。大相大者。

○二別釋二大義。二初體。二相。

○初體。

一切凡夫。聲聞緣覺。菩薩諸佛。無有增減。非前際生。非後際滅。畢竟常恆。

人雖就位。以分優劣。真體隨人。未曾增減也。非前際生。常也。凡位為前。非後際滅。恆也。佛位為後。三句皆顯不增減。所以。

起信論疏卷下

未

○二相。二初正明性德。二問答重辨。

○初正明性德。二初明德相。二顯立名。

○初明德相。三初總。二別。三結。

○初總。

從本以來。自性滿足一切功德。

○二別。

所謂自體。有大智慧光明義故。徧照法界義故。真實識知義故。自性清淨心義故。常樂我淨義故。清涼不變自在義故。

一本覺智明。二本覺顯照諸法。三顯照之時無倒。

四性離惑染。五性德圓備。六性德無遷。

○三結。

具足如是過於恆沙。不離。不斷。不異。不思議佛法。乃至滿足無有所少義故。

不離者。性德塵沙。不離真體也。不斷者。無始相續也不異者。與體同味也。不思議者。即不異而有恆沙之義故。佛法者。唯佛窮達故。亦可。是所覺法故。乃至滿足云者。若此真體無性德者。如來證此。不應具德。既證性已。萬德圓備。即驗真如本具也。

○二顯立名。

起信論疏卷下

七

名爲如來藏。亦名如來法身。

隱時能出生如來。顯時萬德依止。

○二問答重辨。二。初執體疑相難。二。相不違體答。

○初執體疑相難。

問曰。上說真如。其體平等。離一切相。云何復說體有如是種種功德。

○二相不違體答。二。初明雖差別而不二。二。明雖不二而差別。

○初明雖差別而不二。

答曰。雖實有此諸功德義。而無差別之相。等同一味。唯一真如。此義云何。以無分別。離分別相。是故無二。

實德雖多。同一如味。多德何以唯一。此義云何。下釋云。非能分別。非所分別。無能所故。

○二明雖不二而差別。二。初略。二。廣。

○初略。

復以何義。得說差別。以依業識生滅相示。

既其不二。何以說別。以依生滅識相。恆沙染法。反此表示真如淨德。恆沙差別。且舉染本。故但云業識。

○二廣。二。初問對染表示之相。二。舉彼染法對顯。

○初問對染表示之相。

起信論疏卷下

末

此云何示。

○二舉彼染法一一對顯。

以一切法。本來唯心。實無於念。而有妄心。不覺起念。見諸境界。故說無明。

唯心無念者。舉所迷理也。而有妄心者。依真起妄。

謂細麤染心。本末不覺也。將欲釋淨。先舉其染。對

以顯之。下諸句例然。云何顯者。下云。

心性不起。即是大智慧光明義故。

既起念。即是不覺無明。故不起。即是本覺智明。

若心起見。則有不見之相。心性離見。即是徧照法界。

義故。

起見者。妄見不周。離見者。真照圓明。

若心有動。非真識知。無有自性。非常非樂。非我非淨。熱惱衰變。則不自在。乃至具有過恆沙等妄染之義。有動非真知者。反之即顯真如無動也。無有自性者。明妄染無體。反之即顯自性淨心也。非常等者。明妄四倒也。反之即顯真如四德。熱惱者。諸惑燒心。是極熱惱。故說真如是清涼也。衰變者。妄染遷改。反顯真如不衰變也。不自在者。業果繫縛故。則顯真如自在。上云清涼不變自在義故。

起信論疏卷下

无

對此義故。心性無動。則有過恆沙等諸淨功德相義示現。

一一翻對。故染淨皆過恆沙。

若心有起。更見前法可念者。則有所少。

妄心外念。求之不足。

如是淨法。無量功德。即是一心。更無所念。是故滿足。

淨德性滿。無假外求。

名為法身。如來之藏。結名

○二別解用大。二。初總明。二。別釋。

○初總明。二。初對果舉因。二。牒因顯果。

○初對果舉因。三。初舉本正行。二。舉本大願。三。舉悲智大方便。

○初舉本正行。

復次。真如用者。所謂諸佛如來。本在因地。發大慈悲。修諸波羅蜜。攝化眾生。

○二舉本大願。

立大誓願。盡欲度脫等眾生界。亦不限劫數。盡於未來。

盡欲度脫者。廣大心也。盡未來者。長時心也。

○三舉悲智大方便。

以取一切眾生如己身故。而亦不取眾生相。此以何

起信論疏卷下

三

義。謂如實知一切眾生。及與己身。真如平等。無別異故。

如己身者。悲深也。不取相者。智深也。兼上亦則不

顛倒心。亦可釋前長時所以也。此以何義。徵悲智深所以也。謂如實知下。依真如門。答顯深也。

○二牒因顯果。三。一。牒前因。二。自利果。三。正顯用。

以有如是。大方便智。

一牒前因。

除滅無明。見本法身。

二自利果。

自然而有不思議業種種之用。一卽與真如等偏一切處。二又亦無有用相可得。三

三正顯用。卽利他果。於中三一明業用甚深。非待作意。如攝論云。如摩尼天鼓無思成自事等。二顯用廣大。稱理之用故。三則用而常寂也。於中此正顯也。次徵云。

何以故。

佛具三身。何以乃云無有用相。

謂諸佛如來。唯是法身智相之身。第一義諦。無有世諦境界。離於施作。但隨眾生見聞得益。故說爲用。

起信論疏卷下

圭

若廢機感論。如來唯是妙理本智。更無應化世諦生滅等相。但隨緣起用。卽無用。如波卽水。故用恆寂也。涅槃經云。吾今此身。卽是法身等。梁攝論云。唯如如及如智獨存。名爲法身。雖真理妙智。本來常湛。而隨機感。益用無邊。卽寂而常用。

○二別釋。三。初標。二。徵。三。釋。

○初標。

此用有二種。

○二徵。

云何爲二。

○三釋。二。初正顯用相。二。問答除疑。

○初正顯用相。二。初直顯其用。二。重牒分別。

○初直顯其用。二。初應身。二。報身。

○初應身。

一者依分別事識。凡夫二乘心所見者。名爲應身。以不知轉識現故。見從外來。取色分齊。不能盡知故。

凡夫二乘。不知唯識。計有外塵。卽是分別事識義。今見佛身。亦謂心外。順彼事識分別計度。故說依分別事識見也。亦可此人雖覺六識。不知彼七八識。故但云依事識也。名爲應身者。依此麤識分別。

起信論疏卷下

圭

但見應化麤相。不見報身細相。下釋見麤所以云。不知轉識現故。迷於唯心也。取色分齊者。不達卽色是心。無有分齊也。問佛身何故唯眾生識耶。答眾生真心。與諸佛體平等無二。但眾生迷自真理。起於妄念。是時真如。但現染相。不顯其用。以彼本覺內熏妄心。故有厭求。有厭求故。其用卽現。厭求劣故。用相卽麤。厭求漸增。用亦漸細。如是漸漸乃至心源。無明既盡。厭求都息。始覺同本。用還歸體。平等平等。無二無別。未至心源以還。用於識中。隨根顯現。故云識中現也。問若據此義。用從真起。何

故說言轉識現耶。答。轉識卽是梨耶中轉相。依此轉相。方起現識。現諸境界。此識卽是真妄和合。若隨流生死。卽妄有功能。妄雖有功。離真不立。若反流出纏。真有功能。真雖有功。離妄不顯。故就緣起和合識中。說其用耳。問。若據此義。乃是眾生自心中真如之用。云何說言佛報化耶。答。眾生真心。卽諸佛體。更無差別故。華嚴經云。若人欲了知。三世一切佛。應觀法界性。一切唯心造。又不增不減經云。法身卽是眾生。眾生卽是法身。法身與眾生。義一而名異。既從法身起報化用。何得不是眾生真

起信論疏卷下

重

心耶。問。義若然者。眾生心佛。還自教化眾生。何故說言佛悲願力。答。卽此真心。是佛悲願。謂無緣大悲。及自體無障礙化用等。卽性起大用也。問。眾生既無不有心。何不早起化用。令滅無明。答。未有厭求故。問。既元有本覺。何不早熏令起厭求。答。無明厚薄不同。因緣互闕不等。此如上說。問。若真心卽是佛者。何故下文云。從諸波羅蜜等因生。答。此約本覺隨染義說。然其始覺覺至心源平等一際。有何差別。上來約終教說。若約始教說者。卽以諸佛悲智爲增上緣。眾生機感種子爲因緣。故託佛本

質上自心變影像。故云在自識中現也。餘如瑜伽唯識等論說也。

○二報身。初約識舉人。二明所見報相。三結果由因。

○初約識舉人。

二者依於業識。謂諸菩薩。從初發意。乃至菩薩究竟地。心所見者。名爲報身。

十解以去菩薩。能解唯識。無外諸塵。順業識義。以見佛身故。

○二明所見報相。○初正報。後依報。

身有無量色。色有無量相。相有無量好。所住依果。亦

起信論疏卷下

重

有無量種種莊嚴。隨所示現。卽無有邊。不可窮盡。離分齊相。隨其所應。常能住持。不毀不失。初正報身。無分齊。故有無量色。依色有相。相亦無邊。依相有好。好亦無盡。然相以表德。令人敬德。以念佛。好爲嚴身。令人愛樂。欲親近也。後依報。能依無邊。故所依土。亦復無邊。頗胝迦等殊勝之寶。常放光明。無礙校飾。故離分齊相者。異前化身分齊之色。由此菩薩。知分齊卽無分齊。故一一色相。皆徧法界。互融無礙。自在難思。故也。隨其業行所應感者。卽皆常住。非三災等之所壞也。

○三結果由因以釋名。

如是功德皆因諸波羅蜜等。無漏行熏。及不思議熏之所成就。具足無量樂相。故說爲報。

如是依正二報。無障礙。不思議事。皆因十度深行之熏。及本覺不思議熏。二因所成。樂相圓備。故名報身。

○二重牒分別。二。初應身。二報身。

○初應身。

又爲凡夫所見者。是其麤色。隨於六道。各見不同。種種異類。非受樂相。故說爲應。

起信論疏卷下

圭

簡凡異小。如三惡道。習見佛如黑象。腳等三尺之身。又如提謂等。以人天位。見佛爲樹神。及天神身等。準此。卽六道眾生。並見佛不同也。皆非出世相。故非樂也。如二乘人等。見佛爲出世。是阿羅漢等聖人身。

○二報身。

復次。初發意菩薩等所見者。以深信真如法故。少分而見。知彼色相莊嚴等事。無來無去。離於分齊。唯依心現。不離真如。然此菩薩。猶自分別。以未入法身位故。若得淨心。所見微妙。其用轉勝。乃至菩薩地盡。見

之究竟。若離業識。則無見相。以諸佛法身。無有彼此色相。迭相見故。

十解菩薩等。依比觀門。見真如理。是相似覺。故云少分。異前十信。故復云深。異後真證。故但云信也。以見真如。異於凡小。是故得知色相等事。性無分齊也。唯依心現。不離真如者。釋無分齊所以也。攝論中。地上見報身者。彼據證之相應成就處說。今此地前菩薩少分見者。以知色境界。但是現識。不離真如。卽無分齊。故得少分見也。旣非全見。故不相違。但以異前凡小心外取境。見應化故。故約唯

起信論疏卷下

圭

心。少分明見也。然此菩薩。猶自分別者。簡異地上也。若得淨心。所見微妙者。顯於地上所見用相。過於地前。故云轉勝。漸漸微細。至金剛後心。業相都盡。用卽歸體。故云見之究竟。以窮其源故。若離業識。則無見相者。要依業識。乃有轉相。及現相故也。若離業識等無明。卽唯是真如。故佛無有彼此分別之見。

○二問答除疑。二。初問。二答。

○初問。

問曰。若諸佛法身。離於色相者。云何能現色相。

○二答。二。初釋法身能現。二釋所現之色。

○初釋法身能現。

答曰。卽此法身。是色體故。能現於色。總也。下別。所謂從本

以來。色心不二。以色性卽智故。色體無形。說名智身。

以智性卽色故。說名法身。徧一切處。

色心不二者。謂彼所現報化之色。不異法身真心。

如波與水。本來無二也。色性卽智者。明色卽心。顯

前不二。以色卽心故。遂令色相都盡。故就其本。但

云智身。智謂本覺心智也。智性卽色者。明心卽色。

顯前不二。如水徧在波中。

起信論疏卷下

圭

○二釋所現之色。

所現之色。無有分齊。隨心能示十方世界。無量菩薩。

無量報身。無量莊嚴。各各差別。皆無分齊。而不相妨。

此非心識分別能知。以真如自在用義故。

以彼真心。無礙周徧。所現之色。亦復圓融。自在無

礙。故云所現之色。乃至不相妨礙。於中無量菩薩。

者。亦是報身作用也。亦可卽是感報身大用之機。

緣。皆能頓赴。以一一根皆徧法界。然互不相妨。此

真如之用。非妄識能知。

○二會相入實。顯動靜不異。三。初標。一。釋。三結。

○初標。

復次。顯示從生滅門。卽入真如門。所謂推求五陰。色

之與心。

色者色陰。心者四陰。

○二釋。二。初觀色。二觀心。

○初觀色。

六塵境界。畢竟無念。以心無形相。十方求之。終不可

得。

先觀色法也。境從心起。畢竟無體。離心之外。無可

念相也。以心無形相下。非直心外無別六塵。就心

起信論疏卷下

未

內求色等形質。亦不可得。前則所緣無相。此則能

緣無相。

○二觀心。二。一喻。二法。

如人迷故。謂東爲西。方實不轉。喻一。

眾生亦爾。無明迷故。謂心爲念。心實不動。法二。

推求動念。已滅未生。皆不可得。中無可住。無可住

故。則無有起。故知心性實不動也。

○三結。

若能觀察。知心無念。卽得隨順入真如門故。

隨順者。方便觀也。入真如門者。正觀也。

○二對治邪執。二初就本總標。

○初就本總標。

對治邪執者。一切邪執。皆依我見。若離於我。則無邪執。

○二別明治障。二初對治離。二究竟離。

○初對治離。三初標數。二徵。列三辨相。

○初標數。

是我見有二種。

○二徵列。

云何爲二。一者人我見。二者法我見。

起信論疏卷下

无

人我者。計有總相主宰。此是佛法內初學大乘人。迷教妄執。非是外道等所起也。法我者。計一切法。各有體性。卽二乘所起也。

○三辨相。二初人。二法。

○初人。三初標。二徵。三釋。

○初標。

人我見者。依諸凡夫。說有五種。

○二徵。

云何爲五。

此五何別者。初一約果。餘四通因果。餘如科文問。

此等既並於真如法上計。云何說爲人我執耶。答。此有二釋。一云。此是初學凡夫。有人我者。作此執。故云人我執也。二云。由如來藏中有二義。一是本覺義。卽是當人於上妄計。故云人執。二是理實義。當所觀之法。今據初義。故說人執。

○三釋。二初。於空謬執。次。於有倒智。

○初二。於空謬執。二初妄執事空。以爲法體。二妄執法體。唯是空無。

○初妄執事空。以爲法體。三初舉起執緣。二正明執相。三辨對治相。

○初舉起執緣。

一者。聞修多羅說。如來法身。畢竟寂寞。猶如虛空。

起信論疏卷下

手

○二正明執相。

以不知爲破著故。卽謂虛空是如來性。

以眾生執佛色身之礙相。故說法身如虛空。迷說

意故。執同太虛。

○三辨對治相。二初虛空妄非真。二法身真非妄。

○初虛空妄非真。三初立。二釋。三結。

○初立。

云何對治。明虛空相。是其妄法。一體無。不實。二

一立情有。二立理無。

○二釋。

以對色故有。是可見相。令心生滅。一以一切色法本來是心。實無外色。若無色者。則無虛空之相。二

一釋情有也。徧計情中。相待而有。妄念所緣。故非法身。二釋理無也。本以待色爲空。今既唯心無色。何得更有於空。

○三結。二

所謂一切境界唯心。妄起故有。一若心離於妄動。則一切境界滅。唯一真心。無所不徧。二

一結情有也。二結理無也。辦法同喻。以周徧如空。故取虛空爲喻。

起信論疏卷下

三

○二法身真非妄。

此謂如來廣大性智究竟之義。非如虛空相故。

簡法異喻。謂是如來本覺性智。豈同太虛虛妄法也。

○二妄執法體唯是空無。三。初執緣。二執相。三對治。

○初執緣。

二者。聞修多羅說。世間諸法。畢竟體空。乃至涅槃真如之法。亦畢竟空。本來自空。離一切相。

大品云。乃至涅槃。如幻如夢。若當有法勝涅槃者。我說亦復如幻如夢。

○二執相。

以不知爲破著故。卽謂真如涅槃之性。唯是其空。不知爲破情計有故。卽執性德是無。

○三對治。

云何對治。明真如法身。自體不空。具足無量性功德故。

○次三。於有倒智。三。初執性德同色心。二執法性。本有染。二執染有始淨有終。

○初執性德同色心。三。初執緣。二執相。三對治。

○初執緣。

三者。聞修多羅說。如來之藏。無有增減。體備一切功

起信論疏卷下

三

德之法。

○二執相。

以不解故。卽謂如來之藏。有色心法。自相差別。

○三對治。

云何對治。以唯依真如義說故。因生滅染義。示現說差別故。

真如義。二之不二也。生滅染義。不二之二也。如上文云。以依業識生滅相示等。

○二執法性本有染。三。初執緣。二執相。三對治。

○初執緣。

四者聞修多羅說一切世間生死染法皆依如來藏而有。一切諸法不離真如。

○二執相。

以不解故謂如來藏自體具有一切世間生死等法以不解隨緣之義則謂自性有染。

○三對治。初奪破。二縱破。

○初奪破。

云何對治。以如來藏從本以來唯有過恆沙等諸淨功德不離不斷不異真如義故。明淨德妙有。以過恆沙等煩惱染法唯是妄有。性自本無。明妄染理無。從無始世來

起信論疏卷下

重

未曾與如來藏相應故。明妄不入真也。

一明淨德妙有二明妄染理無。三明妄不入真也。

○二縱破。

若如來藏體有妄法而使證會永息妄者無有是處。

○三執染淨有始終。三。初執緣。二執相。三對治。

○初執緣。

五者聞修多羅說依如來藏故有生死依如來藏故得涅槃。

教執治等各二法謂生死涅槃。

○二執相。

以不解故謂眾生有始以見始故復謂如來所得涅槃有其終盡還作眾生。

聞依真有妄便謂真先妄後故起有始見也。如外道立從冥初生覺等既眾生有始依真故證得涅槃者還作眾生成有終之義也。如外道立眾生終盡還歸於冥名為涅槃從冥起覺更作眾生此亦如是。

○三對治。二。初明法體離始則顯生死無初。二。明法體離終則顯涅槃無盡。

○初明法體離始則顯生死無初。

云何對治。以如來藏無前際故無明之相亦無有始。

起信論疏卷下

重

若說三界外更有眾生始起者即是外道經說。

如仁王經云我說三界外別有一眾生界者是外道大有經中說非七佛說也。

○二明法體離終則顯涅槃無盡。

又如來藏無有後際諸佛所得涅槃與之相應則無後際故。

○二法。三。初執緣。二執相。三對治。

○初執緣。

法我見者依二乘鈍根故如來但為說人無我。

○二執相。

以說不究竟。見有五陰生滅之法。怖畏生死。妄取涅槃。

○三對治。

云何對治。以五陰法。自性不生。則無有滅。本來涅槃故。

○二究竟離。二。初約法明治。二會釋伏疑。

○初約法明治。二。初約法總顯。二舉廣類求。

○初約法總顯。

復次究竟離妄執者。當知染法淨法。皆悉相待。無有自相可說。

起信論疏卷下

圭

中論云。若法因待成。是法還成待。今卽無因待。亦無所成法。等準釋可知。相待無相待。法體本爾。非由悟後方使其然。故下云。

○二舉廣類求。

是故一切法。從本以來。非色非心。非智非識。非有非無。畢竟不可說相。

非智識者。顯上非心也。非有無者。顯上非色也。

○二會釋伏疑。三。初正會伏疑。二辨定聖意。三反以釋成。

○初正會伏疑。

而有言說者。當知如來善巧方便。假以言說。引導眾

生。

疑云。聖者了知諸法離性。不可說相。云何乃有種種言說。故牒外難云。有言說者。下釋云。當知如來善巧方便等。正會伏疑也。假言巧引。意不在言。

○二辨定聖意。

其旨趣者。皆爲離念。歸於真如。

○三反以釋成。

以念一切法。令心生滅。不入實智故。

○三分別發趣道相。二。初標意釋名。二開章釋相。

○初標意釋名。

起信論疏卷下

美

分別發趣道相者。謂一切諸佛所證之道。一切菩薩發心修行趣向義故。

一切諸佛所證者。舉所趣之覺道也。一切菩薩發心者。顯能趣之因行也。欲明菩薩發心趣向佛所證道。種類不同。故云分別發趣道相。

○二開章釋相。三。初標數。二徵列。三辨相。

○初標數。

略說發心有三種。

○二徵列。

云何爲三。一者信成就發心。二者解行發心。三者證

發心。

信者。十信行滿。入十住位中。初發心住也。解行者。十行位中。能解法空。順行十度。行成純熟。發迴向心。入十迴向位也。證者。初地以上。乃至十地也。前

二是相似發心。後一是真實發心。

○三辨相。三。初信成就發心。二解行發心。三證發心。

○初信成就發心。三。初明信心成就之行。二顯發心之相。三顯發心利益。

○初明信心成就之行。二。初問。二答。

○初問。

信成就發心者。依何等人。修何等行。得信成就。堪能

起信論疏卷下

三

發心。

一問能修行人。二問所修之行。三問行成堪發。

○二答。○前信滿故進。後信未成故退。二。初正答前勝顯。二舉劣。

勝顯。

○初正答前問。二。初答三問。二結成位。

○初答三問。三。初答能修行人。二答所修行。三答行成堪發。

○初答能修行人。

所謂依不定聚眾生。

分別三聚。乃有多門。今此文中。直明菩薩十住以上。決定不退。名正定聚。未入十信。不信因果。名邪

定聚。此二中間。十信位人。欲求大果。而心未決。或進或退。本業經中。十信菩薩。如空中毛。名不定聚。今依此人。明其修行也。

○二答所修行。

有熏習善根力故。信業果報。能起十善。厭生死苦。欲求無上菩提。得值諸佛。親承供養。修行信心。

謂有聞熏及本覺內熏之力。并依前世諸善根力。故能信業果報。捨惡從善。修福德分也。厭生死苦。欲求菩提者。成菩提分及解脫分善也。上皆辨行因也。得值諸佛供養者。明修行緣也。謂約此因緣。

起信論疏卷下

三

修十種信心行。

○三答行成堪發。

經一萬劫。信心成就故。一諸佛菩薩。教令發心。或以大悲故。能自發心。或因正法欲滅。以護法因緣故。能自發心。二

經萬劫信心成就故。一明行成也。諸佛菩薩下。二約勝緣。正明發心。謂發十住初心也。勝緣雖多。略舉三種。於初中。一他力。後二自力。亦可同下三心。謂順教故得直心。護法故得深心。餘同此也。○二結成位。

如是信心成就得發心者。此下入正定聚畢竟不退

一名位如來種中。正因相應。二

一顯於下無失也。謂入十住初發心住位。不墮凡小之地。二明於上有得也。謂住習種性位。行順內熏之因。故云正因。又此位以去。定當得果。故云正因。以更不退失故。

○二舉劣顯勝。○勝者如前進。劣者如此退。文二。初明

劣相。二結成退失。

○初明劣相。二。初內因力微。二外緣力劣。

○初內因力微。二

起信論疏卷下

无

若有眾生。善根微少。久遠以來。煩惱深厚。一雖值於佛。亦得供養。然起人天種子。或起二乘種子。設有求大乘者。根則不定。若進若退。二

此下有二。善根微少下。一惑重也。雖值於佛下。二德薄也。於中三一倒求。天二異求。二乘三猶豫大乘

不定進退

○二外緣力劣。亦二

或有供養諸佛。未經一萬劫。一於中遇緣。亦有發心。所謂見佛色相而發其心。或因供養眾僧而發其心。或因二乘之人教令發心。或學他發心。二

此下有二。未經萬劫。一行時未滿也。於中遇緣亦

有發心者。二遇緣不勝也。於中有四。一以色見佛

二住相供僧。三隨劣教發心。二乘四學他迹。此等並

非菩薩悲智之心。故欲退失。

○二結成退失。

如是等發心。悉皆不定。遇惡因緣。或便退失。墮二乘地。

○二顯發心之相。三。初牒章以問。二標徵列釋。三問答除疑。

○初牒章以問。

復次信成就發心者。發何等心。

起信論疏卷下

卑

○二標徵列釋。

略說三種。標云何為三。徵

一者直心。正念真如法故。二者深心。樂集一切諸善

行故。三者大悲心。欲拔一切眾生苦故。

直心者。謂向理之心。無別歧路故。即二行之本也。

深心者。備具萬德。歸向心源。即自利行本也。大悲

者。廣拔物苦。令得菩提。即利他行本也。妙行雖廣

三行統收。故標云略說三也。以此即是三聚戒故

三德三身。皆由此成故。亦即是彼三迴向故。謂初

向實際。次向菩提。後向眾生。皆應相配釋之。

○三問答除疑。二。初問。二。答。

○初問。

問曰。上說法界一相。佛體無二。何故不唯念真如。復假求學諸善之行。

○二答。二。初正答所問。二。重顯方便。

○初正答所問。二。初喻。二。合。

○初喻。

答曰。譬如大摩尼寶。體性明淨。而有鑛穢之垢。若人雖念寶性。不以方便種種磨治。終無得淨。

○二合。三。初正合。二。委釋。三。順真。

起信論疏卷下

聖

○初正合。

如是眾生真如之法。體性空淨。而有無量煩惱垢染。

若人雖念真如。不以方便種種熏修。亦無得淨。

○二委釋。

以垢無量。徧一切法。故修一切善行。以為對治。

釋須修眾行所以。

○三順真。

若人修行一切善法。自然歸順真如法故。

以諸善行。外違妄染。內順真如故。

○二重顯方便。三。初標數。二。徵起。三。別釋。

○初標數。

略說方便有四種。

○二徵起。

云何為四。

○三別釋。○四門各三。一標名。二釋相。三明意。文三。

初一不住道。次二自利行。三一利他行。

○初一不住道。

一者行根本方便。謂觀一切法。自性無生。離於妄見。不住生死。觀一切法。因緣和合。業果不失。起於大悲。修諸福德。攝化眾生。不住涅槃。以隨順法性。無住故。

起信論疏卷下

聖

不住生死。智也。不住涅槃。悲也。

○次二。自利行。二。初斷德。二。智德。

○初斷德。

二者能止方便。謂慚愧悔過。能止一切惡法。不令增長。以隨順法性。離諸過故。

勤斷二惡。止持門也。

○二智德。

三者發起善根增長方便。謂勤供養。禮拜三寶。讚歎隨喜。勸請諸佛。以愛敬三寶。淳厚心故。信得增長。乃能志求無上之道。又因佛法。僧力所護。故能消業障。

善根不退。以隨順法性。離癡障故。

勤修二善。作持門也。勤供養等。約緣修行也。以愛敬三寶下。辨修利益云。愛敬四句。一愛而非敬。如母於子等。二敬而非愛。如僕於主等。三亦敬亦愛。如修行人於三寶等。四非敬非愛。如冤家等。

○三一。利他行。

四者大願平等方便。所謂發願盡於未來。化度一切眾生。使無有餘。皆令究竟無餘涅槃。以隨順法性。無斷絕故。法性廣大。徧一切眾生。平等無二。不念彼此。究竟寂滅故。

起信論疏卷下

聖

盡未來。長時心也。度一切。廣大心也。究竟涅槃。第一心也。隨順法性下。一正顯順性。法性廣大。下二明起大願意。亦即常心也。

○三顯發心利益。四。初顯勝德。二明微過。三通權教。四歎實行。

○初顯勝德。

菩薩發是心故。則得少分見於法身。以見法身故。隨其願力。能現八種利益眾生。所謂從兜率天退。入胎。住胎。出胎。出家。成道。轉法輪。入於涅槃。

十解菩薩。依比觀門見。故云少分。亦可依人空見也。八種利益者。初發心住中。能作此事。

○二明微過。

然是菩薩。未名法身。以其過去無量世來。有漏之業。未能決斷。隨其所生。與微苦相應。亦非業繫。以有大願自在力故。

未名法身者。異地上也。以未證真。但依信力。見於少分。以其過去有漏業未斷者。釋異所以也。亦非業繫者。異凡夫也。菩薩於報。修短自在。不由惑業也。有大願力者。以留惑益生。悲願之力故。

○三通權教。

如修多羅中。或說有退墮惡趣者。非其實退。但為初

起信論疏卷下

聖

學菩薩。未入正位。而懈怠者。恐怖令彼勇猛故。

如修多羅說者。一舉教也。非其實退下。二釋通也。文皆可見。如纓絡本業經中。言七住以前。名為退分。若不值善知識者。若一劫乃至十劫。退菩提心。如淨目天子。法才王子。舍利弗等。各入第六住。其間值惡知識。因緣故。退入凡夫。不善趣中。乃至廣說。今釋此意。是權語。非實退。但恐怖彼初入人。令不慢故也。

○四歎實行。

又是菩薩。一發心後。遠離怯弱。畢竟不畏墮二乘地。

一若聞無量無邊阿僧祇劫。勤苦難行。乃得涅槃。亦不怯弱。以信知一切法。從本以來。自涅槃故。

一發心後下。一於下不戀也。若聞無量下。二於上不怯也。以信知本來涅槃者。釋不怯所以也。此即顯彼經文是權非實故。

○二解行發心。二初總標歎勝。二顯其勝相。

○初總標歎勝。

解行發心者。當知轉勝。

前位信滿入解。今此行滿入向。更深發心故也。

○二顯其勝相。二初時勝。二行勝。

起信論疏卷下

畢

○初時勝。

以是菩薩。從初正信以來。於第一阿僧祇劫。將欲滿故。

鄰初地故。

○二行勝。二初總。二別。

○初總。

於真如法中。深解現前。所修離相。

深解。解也。所修離相。行也。下六度中。皆明此二。

○二別。

以知法性體。無慳貪故。隨順修行檀波羅蜜。以知法

性無染。離五欲過故。隨順修行尸波羅蜜。以知法性無苦。離瞋惱故。隨順修行羼提波羅蜜。以知法性無身心相。離懈怠故。隨順修行毘梨耶波羅蜜。以知法性常定。體無亂故。隨順修行禪波羅蜜。以知法性體明。離無明故。隨順修行般若波羅蜜。

以知法性無慳貪故。顯上深解現前也。隨順修行檀波羅蜜。顯上所修離相也。下五一準。此謂離三輪等相。以十行以去菩薩。得法空故。能順法界修六度等行。即發心所依之解行。以垢障乖真。故修離障之行。以順如也。

起信論疏卷下

畢

○三證發心。三初通明發心體。二明發心相。三明成滿德。

○初通明發心體。三初標地依。二明行體。根本。三明勝用後得。

○初標地依。

證發心者。從淨心地。乃至菩薩究竟地。證何境界。所謂真如。

○二明行體根本。

以依轉識。說為境界。而此證者。無有境界。唯真如智。名為法身。

境界即是現識。必依轉相起故。然本智正證之時。實無能所。豈可得說。以為境界。今但約後得智中。

業識未盡。故轉現猶存。假就此識說正證中。定有真如爲所證境也。以後得智。反緣正證。亦有現似境故。說轉識現也。而實真證能所平等。

○三明勝用後得。文中四。一攝法上首。二隨根延促。三實行不殊。四應機殊行。

○初攝法上首德。
是菩薩於一念頃。能至十方無餘世界。供養諸佛。請轉法輪。一唯爲開導利益眾生。不依文字。二

此下有二。一正明請法。二顯其請意。

○二隨根延促德。

或示超地。速成正覺。以爲怯弱眾生故。一或說我於

起信論疏卷下

罽

無量阿僧祇劫。當成佛道。以爲憊慢眾生故。二能示如是無數方便。不可思議。三

一促也。於中先舉用。後顯意。二延也。亦先舉用。後顯意。三結。

○三實行不殊德。

而實菩薩種性根等。一發心則等。二所證亦等。三無有超過之法。以一切菩薩皆經三阿僧祇劫故。四

此下有四。一因等。二行等。三證等。四時等。

○四應機殊行德。

但隨眾生世界不同。所見所聞。根欲性異。故示所行。

亦有差別。

○二明發心相。

又是菩薩發心相者。有三種心微細之相。云何爲三。一者真心。無分別故。二者方便心。自然徧行利益眾生故。三者業識心。微細起滅故。

一根本無分別智。二後得智。三卽二智所依阿黎耶識也。理實亦有轉現。但今略舉根本細相。此非發心之境。但顯此菩薩二智起時。有微細生滅之累。不同佛地純淨之德。是故合爲發心相。

○三明成滿德。二初正顯勝德。二問答除疑。

起信論疏卷下

罽

○初正顯勝德。二初總別。

○初總。二有。

又是菩薩功德成滿。一於色究竟處。示一切世間最高大身。二

有二。一因位窮也。故地論云。一者現報利益。受佛位故。二果位彰也。故地論云。二者後報利益。摩醯首羅智處生也。何故他受用報身在此天者。一義云。以寄十王。顯其十地。然第十地菩薩。寄當此天。卽於彼身。示成菩提。故在彼天。餘義如別說。

○二別。

謂以一念相應慧無明頓盡名一切種智自然而有不思議業能現十方利益眾生

一念相應者謂一念始覺至心源時契於本覺也一切種智者無明盡故顯照諸法也亦可一念等皆無間道名一切種智是解脫道即顯上真心於此成也上皆自利行滿下則利他德顯云自然而有者顯上方便心明不待功用也又亦可初智淨相後不思議業相皆是本覺隨染所成也

○二問答除疑二初除一切種智疑二除自然業用疑

○初除一切種智疑二初問二答

起信論疏卷下

咒

○初問二

問曰虛空無邊故世界無邊世界無邊故眾生無邊眾生無邊故心行差別亦復無邊如是境界不可分齊難知難解一若無明斷無有心想云何能了名一切種智二

有二一且陳疑謂有虛空處皆有世界有世界處皆有眾生有眾生處皆有心行如是境界分齊難知也若無明斷下二正設難難云非直外境無邊分齊難知亦復內盡心想云何得了也

○二答三初立正理一舉非顯失三舉是彰得

○初立正理

答曰一切境界本來一心離於想念

意云只由內盡妄想心故能外廣知也境雖無邊不出一心既證心源何不能了真心之境離於妄念故盡想念方始能知也

○二舉非顯失

以眾生妄見境界故心有分齊一以妄起想念不稱法性故不能了二

一妄見有限之境二釋成不見所由即明為妄見故有所不見

起信論疏卷下

辛

○三舉是彰得

諸佛如來離於見相無所不徧心真實故即是諸法之性自體顯照一切妄法有大智用無量方便隨諸眾生所應得解皆能開示種種法義是故得名一切種智

無不徧者無妄見故無所不見也心真實者佛心離妄體一心源無始覺之異故即是諸法性者然此本覺在生滅門中為妄法之體故自體顯照者一切妄法並是本覺佛心之相相既現於自體之上以體照其相有何難了而不知也故云自體照

等也。故上文中辨佛報化之用。則在於眾生心中。今辨眾生妄法。則在於佛心之上。良以心源無二。故得然也。華嚴云。如心佛亦爾。如佛眾生然。心佛及眾生。是三無差別。此之謂也。有大智用者。以同體智力。起勝方便。攝化有情。

○二除自然業用疑。二。初問。二答。

○初問。

又問曰。若諸佛有自然業。能現一切處。利益眾生者。一切眾生。若見其身。若覩神變。若聞其說。無不得利。云何世間多不能見。

起信論疏卷下

至

亦二。一且陳疑。二正設難。

○二答。有法喻合。

答曰。諸佛如來。法身平等。徧一切處。無有作意。故說自然。但依眾生心現。法也。眾生心者。猶如於鏡。鏡若有垢。色像不現。喻也。如是眾生心。若有垢。法身不現。合也。

有法喻合。諸佛如來。依眾生心現。以法身普照。徧眾心中。但有厭求機感。即顯麤細之用。非由功用也。上文中已顯此義也。眾生心有垢者。明無感佛之機。非謂煩惱現行。以善星等煩惱心中。得見佛故。法身不現者。法身能現報化之用。今據本而言。

故云法身不現也。如攝論中十二甚深。皆是法身之德。顯現甚深。彼中言由世尊不現。如月於破器中。釋曰。諸佛於世間不顯現。而世間諸佛身常住。云何不現。譬如破器中。水不得住。水不住故。於破破器實有月。不得顯現。如是諸眾生。無奢摩他。輭滑相續。但有過失相續。於彼實有諸佛。亦不顯現。水譬奢摩他。輭滑性故。此中依定得見佛者。是過去修習念佛三昧。乃於此世得見佛身。非謂今世。要依定心。方能見佛。以散心中。亦見佛故。彼攝論中。約過去定習為因。非約現在。此論中約根熟為

起信論疏卷下

至

因。非約無惑。有此左右。

○四修行信心分。四。初結前生後。二就人標意。三約法廣辨。四防退方便。

○初結前生後。

已說解釋分。次說修行信心分。

來意者。以上來明其大乘。今為正明心信。故有此來分也。

○二就人標意。

是中依未入正定聚眾生。故說修行信心。不定聚人有二。二者修信滿足。為說發趣道相。令入正定。是前勝人也。二者修信未滿。是前劣人。即

此文所爲。以四信五行。令其修行。使信成滿。信成滿已。還依發趣入正定也。

○三約法廣辨。二。初興兩問。二。還兩答。

○初興兩問。

何等信心。云何修行。

○二還兩答。二。初答信心。二。答修行。

○初答信心。三。初標數。二。徵起。三。列釋。

○初標數。

略說信心有四種。

卽四不壞信也。

起信論疏卷下

○二徵起。

云何爲四。

○三列釋。

一者信根本。所謂樂念真如法故。

真如之法。諸佛所師。眾行之源故。樂念者。非直就

起信心。亦乃樂念觀察。

二者信佛。有無量功德。一常念親近。供養恭敬。發起

善根。願求一切智故。二三者信法。有大利益。一常念

修行諸波羅蜜故。二四者信僧。能正修行。自利利他

一常樂親近諸菩薩眾。求學如實行故。二

三

三寶中各二。一標所信之勝德。二起勝因以願求。

○二答修行。三。初舉數標意。二。徵起。列名。三。依門牒釋。

○初舉數標意。

修行有五門。能成此信。

有信無行。則信不堅。不堅之信。遇緣便退。故修五行。以成四信之心。令不退也。

○二徵起列名。

云何爲五。一者施門。二者戒門。三者忍門。四者進門。五者止觀門。

止觀合修。定慧雙運。二門不二。故唯五也。

起信論疏卷下

○三依門牒釋。五。初施。二。戒。三。忍。四。進。五。止觀。

○初施。

云何修行施門。寄問。以標。若見一切來求索者。所有財物。

隨力施與。以自捨慳貪。令彼歡喜。一若見厄難恐怖

危逼。隨已堪任。施與無畏。二若有眾生來求法者。隨

己能解。方便爲說。不應貪求名利恭敬。唯念自利利

他。迴向菩提故。三。

一資財施也。二無畏施也。三法施也。

○二戒。

云何修行戒門。所謂不殺。不盜。不婬。不兩舌。不惡口。

不妄言。不綺語。遠離貪嫉欺詐。詔曲瞋恚邪見。^一若出家者。爲折伏煩惱故。亦應遠離憤鬧。常處寂靜。修習少欲知足。頭陀等行。乃至小罪。心生怖畏。慚愧改悔。不得輕於如來所制禁戒。^二當護譏嫌。不令眾生妄起過罪故。^三

一攝律儀戒。二攝善法戒。又從小罪下。明護戒心。三攝眾生戒。

○三忍。

云何修行忍門。所謂應忍他人之惱。心不懷報。亦當忍於利衰毀譽稱譏苦樂等法故。

起信論疏卷下

圭

應忍他惱者。他不饒益忍也。下明安受苦忍云。利謂財榮潤己。衰謂損耗侵陵。毀謂越過以毀譽。謂越德而歎。稱謂依實德讚。譏謂依實過論。苦謂逼迫侵形。樂謂心神適悅。

○四進。^二初正顯。^二別明除障方便。

○初正顯。

云何修行進門。所謂於諸善事。心不懈退。^一立志堅強。遠離怯弱。^二當念過去久遠以來。虛受一切身心大苦。無有利益。^三是故應勤修諸功德。自利利他。速離眾苦。

一勤勇精進。二難壞精進。三無足精進。以念已長淪。虛受大苦。以自勸勵。修善無厭也。是故應勤下總結勸修。

○二別明除障方便。^二初障。^二初治。

復次。若人雖修行信心。以從先世來。多有重罪惡業障故。^一爲邪魔諸鬼之所惱亂。或爲世間事務種種牽纏。或爲病苦所惱。有如是等眾多障礙。^二

此下有二。^一內有業障。卽因也。^二外感報障。卽緣也。

起信論疏卷下

圭

○二治。

是故應當勇猛精勤。晝夜六時。禮拜諸佛。^一誠心懺悔。勸請隨喜。迴向菩提。常不休廢。得免諸障。善根增長故。^二

此下有二。禮佛者。一總明除障方便。如人負債。依附於王。則債主無如之何。如是行人。禮拜諸佛。諸佛所護。能脫諸障也。誠心下。二別除四障。一懺悔除惡業障。^二勸請除謗法障。^三隨喜除嫉妬他勝障。^四迴向菩提。除樂三有障。不休廢者。總結能治也。免諸障者。總結所治也。善根增長者。結益也。由

此四障能令行人不發諸行不趣菩提故四行治盡善根長也又初一治業障以止持故後三長善根以作持故

○五止觀二初略明二廣說

○初略明二初微二釋

○初微

云何修行止觀門

寄問以標

○二釋三初止二觀三俱

○初止

起信論疏卷下

焉

所言止者謂止一切境界相隨順奢摩他觀義故

先由分別依諸外塵今以覺慧唯識道理破外塵相塵相既止無所分別故云止此是方便也奢摩他此云止也但今就方便存此方語約止即存梵言也以雙現時方名止觀故今但言隨順

○二觀

所言觀者謂分別因緣生滅相隨順毘鉢舍那觀義故

毘鉢舍那此云觀也依生滅門觀察法相故言分別如瑜伽論菩薩地云此中菩薩即於諸法無所

分別當知名止若於諸法勝義理趣及諸無量安立理趣世俗妙慧當知名觀是知依真如門止諸境相無所分別即成根本無分別智依生滅門分別諸相觀諸理趣即成後得智然此二門唯一心是故雙運方得名為正止觀也

○三俱

云何隨順以此二義漸漸修習不相捨離一雙現前故二

此下有二一顯能隨之方便二明所隨之止觀隨相而論止名定觀名慧就實而言定通止觀慧亦

起信論疏卷下

焉

如是如梁攝論云十波羅蜜通有二體一不散亂為體謂止定二不顛倒為體謂觀慧也

○二廣說三初止二觀三俱

○初止五初修方便二顯勝能三辨魔事四簡真偽五示益勸

○初修方便二初明勝人能入二顯障者不能入

○初明勝人能入二初託靜息心修止方便二止成得定除障不退

○初託靜息心修止方便二初約外緣二安內心

○初約外緣

若修止者住於靜處端坐正意

若具言之有五緣一者閒居靜處謂住山林及諸

閒靜等處。若住聚落。必有誼動。二者持戒清淨。謂離業障。若不淨者。必須懺悔。三者衣食具足。四者得善知識。五者息諸緣務。今略舉初。故云靜處也。端坐者。調身也。先安坐靜處。每令安穩。久久無妨。次當正腳。或全跏。或半跏。若全跏者。先以左腳置右髀上。牽來近身。令腳指與髀齊。次解緩衣帶。使周正。不令坐時脫落。次以左手置右手上。壘手相對。頓置腳上。牽來近身。當心而安。次當正身。先挺動其身。并諸支節。作七八反。如自按摩法。亦勿令手足差異。正身端直。令脊骨相當。勿曲勿聳。次正

起信論疏卷下

美

頭頸。令鼻與臍相對。不偏不邪。不低不昂。平面正住。次以舌約上齦。次閉眼。不令全合。廣如天台山顓禪師二卷止觀中說也。今略總說。故言端坐也。正意者。調心也。末世行人。正願者少。邪求者多。詐現寂靜威儀。苟求名利。心既不正。得定無由。離此邪求。故云正意。意欲令其觀心與理相應。自度度他。至無上道。名正意也。

○二安心二。初約坐時修正。二。約餘威儀修正。

○初約坐時修正二。初離境。

○初離境

不依氣息。不依形色。不依於空。不依地水火風乃至不依見聞覺知。

息。謂數息觀境也。形。謂骨鎖等也。色。謂青黃赤白四相也。地等五相。皆是事定所緣之境也。見聞覺知。是識一切處。通前爲十一切處。亦可見聞等。是舉散心時所取六塵。於此等諸塵。推求了達。知唯自心。不復託緣。故言不依也。

○二除心

一切諸想。隨念皆除。亦遣除想。以一切法。本來無想念。念念不生。念念不滅。亦不得隨心外念境界。後以心

起信論疏卷下

至

除心。心若馳散。卽當攝來。住於正念。是正念者。當知唯心。無外境界。卽復此心。亦無自相。念念不可得。隨念皆除者。除前諸境。更有餘心。皆亦遣也。亦遣除想者。所遣既無。能遣不立。泯然寂靜。方名止也。問。何故能所心想。二並不存。下答云。一切法本來無想。欲順於法性故。能所皆不存也。念念不生不滅者。轉釋成法性無想所以也。良以想無自性。窮之則空。故無生滅自體可得。此乃卽生無生。卽滅無滅故也。如陽炎水。本自乾耳。亦不得隨心外念者。若心外有實境。心緣此境時。抑令不緣。不可得。

故。後以心除心者。今既心外無塵。即所取無相。所取無相。故能取自然不生。何勞後心方更除耶。心若馳散者。初習多馳。故攝令住正。何者正念。下云。外境唯心。是為正念也。妄境既無。唯心亦寂。

○二約餘威儀修止。

若從坐起。去來進止。有所施作。於一切時。常念方便。隨順觀察。

非直坐時。常修此止。餘威儀中。一切時處。常思方便。順於法性。不動道理。

○二止成得定。除障不退。分三

起信論疏卷下

空

久習淳熟。其心得住。一以心住故。漸漸猛利。隨順得入。真如三昧。二深伏煩惱。信心增長。速成不退。三

一止成也。二明止力。附心猛利。得定。三明伏惑入位。即信滿入住也。

○二顯障者不能。

唯除疑惑。不信。誹謗。重罪業障。我慢。懈怠。如是等人。所不能入。

一於理猶豫。二闡提。三外道。四五逆四重。五恃我自高。六放逸不勤。是六種障。隨有一種。即不能入。

○二顯勝能。二。初能生一行三昧。二能生無量三昧。

○初能生一行三昧。

復次。依是三昧故。則知法界一相。一謂一切諸佛法身。與眾生身。平等無二。二。即名一行三昧。三。

一標立。二釋相。三顯名。

○二能生無量三昧。

當知真如。是三昧根本。

文殊般若經云。何名一行三昧。佛言。法界一相。繫緣法界。是名一行三昧。入一行三昧者。盡知恆沙諸佛法界。無差別相。乃至廣說。以此真如三昧。能生此等無量三昧。故名三昧根本也。上皆一行三

起信論疏卷下

空

昧。下明無量三昧云。

若人修行。漸漸能生無量三昧。

義如上所引文殊般若經中已說。

○三辨魔事。二。初略。二。廣。

○初略。二。初魔事。二。對治。

○初魔事。

或有眾生。無善根力。則為諸魔外道鬼神之所惑亂。若於坐中。現形恐怖。或現端正男女等相。

魔。天魔也。此云障礙。鬼。堆惕鬼也。神。精魅也。如是鬼神。嬖亂佛法。令入邪道。故名外道。如是三種。能

變作三種五塵壞人善心。三種者云下一示可畏之身怖之以失志。二現可愛之形惑之以生染。三現非違非順平等五塵動亂人心。

○二對治

當念唯心境界則滅終不爲惱

一切諸境尚唯自心何況坐中此等諸境是故觀察唯心魔境隨滅不能擾亂以此唯心非彼所知故此是通遣之法別門遣者治諸魔者當誦大乘般若及治魔咒默念誦之治諸鬼者堆惕鬼者或如蟲蝎緣人頭面鑽刺熠熠或復擊歷人兩腋下

起信論疏卷下

奎

乍抱持於人或言說音聲誼誼及作諸獸之形異相非一來惱行者則應閉目一心陰而罵之作如是言我今識汝汝是此閻浮提中食火嗅香偷臘吉支邪見喜破戒種我今持戒終不畏汝若出家人應誦戒律若在家者應誦菩薩戒本或誦三歸五戒等鬼便却行匍匐而出也精魅神者謂十二時獸能變作種種形色或作少男女相或作老宿之形及作可畏身相等非一眾多惱亂行者其欲惱人各當十二時中本時來也若其多於寅時來者必是虎兇等乃至若多於丑時來者必是牛類

等行者恆用此時則知某獸精魅說其名字訶責卽當謝滅此等皆如禪經中及顓禪師止觀中廣說

○二廣

初魔事十事五對二對治

○初魔事十事五對

或現天像菩薩像亦作如來像相好具足若說陀羅尼若說布施持戒忍辱精進禪定智慧或說平等空無相無願無怨無親無因無果畢竟空寂是真涅槃一現形說法

或令人知宿命過去之事亦知未來之事得他心智

起信論疏卷下

奎

辯才無礙

二得通起辯

能令眾生貪著世間名利之事又令人數瞋數喜性無常準或多慈愛多睡多病其心懈怠或卒起精進後便休廢生於不信多疑多慮或捨本勝行更修雜業若著世事種種牽纏

三起惑造業

亦能使人得諸三昧少分相似皆是外道所得非真三昧或復令人若一日若二日若三日乃至七日住於定中得自然香美飲食身心適悅不飢不渴使人

愛著

四據定得禪。

或令人食無分齊。乍多乍少。顏色變異。

五食差顏變。五對皆如文可見。問。如現佛菩薩像。說甚深法。或是宿世善根所發。云何揀別定其邪正。答。此事實難。所以然者。若是魔所作。謂是善相。而心取著。則墮邪綱。若實是善根所發之境。謂為魔事。心疑捨離。則退失善根。終無進趣。是故邪正實難取別。今且依古德相傳。略以三法驗之。一以定研磨。二依本修治。三智慧觀察。如經言。欲知真

起信論疏卷下

奎

金。三法試之。謂燒打磨。行人亦爾。難可別識。若欲別之。亦須三試。一則常與共事。共事不知。當與久處。久處不知。智慧觀察。今借此意。以驗邪正。謂定中境相發時。邪正難知者。當深入定心。於彼境中。不取不捨。但平等定住。若是善根之所發者。定力逾深。善根彌發。若是魔所為者。不久自壞。第二依本修汝者。且如本修不淨觀禪。今則依本修不淨觀。若如是修。境界增明者。則非偽也。若以本修治。漸漸滅者。當知是邪也。第三智慧觀察者。觀所發相。推驗根源。不見生處。深知空寂。心不住著。邪當

自滅。正當自現。如燒真金。益其光色。若是偽金。即自當焦壞。此中真偽。當知亦爾。定譬於磨。本治猶打。智慧觀察。類之以燒。以此三驗。邪正可得知也。

○二對治。

以是義故。行者常應智慧觀察。勿令此心墮於邪綱。依自隨分所有覺慧。觀諸魔事。察而治之。若不觀察。則墮邪道。三種驗中。此當第三智慧觀察。當勤正念。不取不著。則能遠離是諸業障。

邪不干正。自然退散。若取著者。則背正入邪。若不取著。則因邪顯正。是故邪正在著不著也。不取著

起信論疏卷下

奎

故。無障不離。如智度論云。除諸法實相其餘一切。皆是魔事。偈云。若分別境相。即是魔羅網。不動不分別。是即為法印。此之謂也。從當勤下。總顯三中前之二法。以此大乘止門。唯修理定。更無別趣。故初定研磨。并依本修治。更無別法。所以合說。但依本止門故。

○四簡真偽。

二。初舉內外二定。以別邪正。二。對理事二定。以明真偽。

○初舉內外二定。以別邪正。

二。初邪正。

應知外道所有三昧。皆不離見愛我慢之心。貪著世

閒名利恭敬故。

我見我愛我慢之使常相應也。內著邪定。外貪名利。又但一切禪定。不能減損煩惱者。皆不可據也。

○二正。

真如三昧者。不住見相。不住得相。乃至出定。亦無懈慢。所有煩惱漸漸微薄。

真如三昧者。謂在定時而不味著也。不住見相。以忘心故。不住得相。以忘境故。出定亦無恃定之慢。貪瞋癡漸薄。卽正定之相也。

○二對理事二定以明真偽。二。初真。二。偽。

起信論疏卷下

奎

○初真。

若諸凡夫。不習此三昧法。得入如來種性。無有是處。謂修大乘菩薩行者。要依此真如三昧。方入種性。不退位中。除此更無能入之路也。種性者。約位在十住已去。不退位中辨。

○二偽。

以修世間諸禪三昧。多起味著。依於我見。繫屬二界。與外道共。若離善知識所護。則起外道見故。

世間三昧。謂四禪四空定等。世間諸定。及不淨安般等。但取境相定。皆名世間定也。以味著定境故。

不離於我。故云與外道共。共者。同得此事定故。以其共故。若得善友護助之力。得入佛法。若離善友。則入邪道。

○五示益勸。二。初總標。二。別解。

○初總標。

復次。精勤專心。修學此三昧者。現世當得十種利益。後世利益。無量無邊。現世利益。略陳十種。

○二別解。

云何爲十。

十中分三。初一。善友攝護益。次四。離障益。三五。行

起信論疏卷下

奎

成堅固益。

一者。常爲十方諸佛菩薩之所護念。

初一。善友攝護益。以修此真如三昧故。諸佛菩薩。法應護念。令得勇猛。勝進不退也。

二者。不爲諸魔惡鬼所能恐怖。三者。不爲九十五種外道鬼神之所惑亂。四者。遠離誹謗甚深之法。重罪業障。漸漸微薄。五者。滅一切疑諸惡覺觀。

次四。離障益。分二。一離外惡緣。又二。一離天魔現

形。二。離外道邪惑。三。離內惑業。又二。一除業也。四。離誹謗等。不起新業也。重罪漸微者。舊業輕

也。二滅惑也。五者

六者。於諸如來境界。信得增長。七者。遠離憂悔。於生
外中。勇猛不怯。八者。其心柔和。捨於憍慢。不爲他人
所惱。九者。雖未得定。於一切時。一切境界處。則能減
損煩惱。不樂世間十者。若得三昧。不爲外緣一切音
聲之所驚動。

三五。行成堅固益。五。分一。於理增信。六。者二。處染不怯。

者。三。不爲緣壞。八。者四。無世滋味。九。者五。得深禪定。十。者

○二觀。三。初明修觀意。二辨觀行相。三結觀分齊。

○初明修觀意。

起信論疏卷下

究

復次。若人唯修於止。則心沈沒。或起懈怠。不樂眾善。
遠離大悲。是故修觀。

不樂眾善。失自利也。下初觀以治之。第四觀以成
之。遠離大悲。失利他也。下第二觀以治之。第三觀
以成之。

○二辨觀行相。四。初法相觀。二大悲觀。三大願觀。四精進觀。

○初法相觀。○明四非常觀。文四。初無常。二苦觀。三無我。四不淨。

○初無常觀。

修習觀者。當觀一切世間有爲之法。無得久停。須臾
變壞。

一切有爲法句。總標四觀所觀也。

○二苦觀。

一切心行。念念生滅。以是故苦。

○三無我觀

應觀過去所念諸法。恍忽如夢。應觀現在所念諸法。
猶如電光。應觀未來所念諸法。猶如於雲。歛爾而起。
如夢者。無體難追。如電者。剎那不住。如雲者。本無
積聚。但緣集歛有。不從十方來。

○四不淨觀。

應觀世間一切有身。悉皆不淨。種種穢汙。無一可樂。

起信論疏卷下

手

上來四觀。除於常等四倒。配釋可知。

○二大悲觀。

如是當念一切眾生。從無始時來。皆因無明所熏習。
故令心生滅。已受一切身心大苦。現在卽有無量逼
迫。未來所苦。亦無分齊。難捨難離。而不覺知。

無心厭背。故使苦無限也。

眾生如是。甚爲可愍。

深發悲心。

○三大願觀。

作是思惟。卽應勇猛。立大誓願。願令我心離分別故。

因悲立願也。心離分別者。願體也。

徧於十方。修行一切諸善功德。盡其未來。以無量方便。救拔一切苦惱眾生。令得涅槃第一義樂。

盡未來者。長時心也。救一切者。廣大心也。得涅槃樂。第一心也。

○四精進觀。

以起如是願故。於一切時。一切處。所有眾善。隨己堪能。不捨修學。心無懈怠。唯除坐時。專念於止。

○三結觀分齊。

若餘一切。悉當觀察。應作不應作。

起信論疏卷下

圭

順理應作。違理不應作。

○三俱三。

初總標。二別辨。三總結。

○初總標。

若行若住。若臥若起。皆應止觀俱行。

上來始習未淳。故動靜別修。今定慧終成。故能雙

運。

○二別辨。

二。初約法明俱。二對障明俱。

○初約法明俱。

二。初即止之觀。二即觀之止。

○初即止之觀。

所謂雖念諸法自性不生。而復即念因緣和合善惡

之業。苦樂等報。不失不壞。

約非有義。以明止。約非無義。以明觀。此二不二。故云即也。此順不動真際。而建立諸法。良以非有即是非無。故能不捨止而修觀也。

○二即觀之止。

雖念因緣善惡業報。而亦即念性不可得。

此順不壞假名。而說諸法實相。良以非無即是非有。故能不捨觀而修止也。此說時有前後。然在行心。鎔融不二。不二之性。即是實性。理味在此。宜可思之。

起信論疏卷下

圭

○二對障明俱。

若修止者。對治凡夫住著世間。能捨二乘怯弱之見。

治於二過。謂正治凡夫。人法二執。貪樂世間。兼治

二乘。執五陰法。見苦生怖。以止門無生。除此等執

若修觀者。對治二乘不起大悲。陞劣心過。遠離凡夫

不修善根。

亦治二過。謂正治二乘。陞劣之心。令普觀眾生。起

於大悲。兼治凡夫懈怠之心。令觀無常。策修善行

○三總結。

以是義故。是止觀門。其相助成。不相捨離。若止觀不

具則無能入菩提之道

如凡夫人。非不樂世間。無以勤修善行。約二乘人。非不怖生死。無以起於大悲。是二行不相離也。止觀相須。如鳥兩翼。車之二輪。二輪不具。則無運載之功。一翼若闕。則無凌虛之勢。

○四防退方便。二。初明可退之人。二。明防退之法。

○初明可退之人。

復次。眾生初學是法。欲求正信。其心怯弱。以住於此娑婆世界。自畏不能常值諸佛。親承供養。懼謂信心難可成就。意欲退者。

起信論疏卷下

七

先標行劣。下舉處釋成也。以其內心既劣。外闕勝緣。信行難成。故欲退也。

○二明防退之法。二。初通舉聖意。二。別引經證。

○初通舉聖意。

當知如來。有勝方便。攝護信心。

標聖善巧。

謂以專意念佛因緣。隨願得生他方佛土。常見於佛。永離惡道。

釋顯巧相。

○二別引經證。

如修多羅說。若人專念西方極樂世界阿彌陀佛。所修善根。迴向願求生彼世界。即得往生。

引經也。下釋經文。

常見佛故。終無有退。若觀彼佛真如法身。常勤修習。畢竟得生。住正定故。

但往生之人。約有三位。一。如蓮花未開時。信行未滿。未名不退。但以處無退緣。故稱不退。二。信位滿足。已去華開見佛。入十住位。得少分見法身。住正定位也。三者三賢位滿。入初地。已去證徧滿法身。生無邊佛土。如佛記龍樹菩薩等。住初地。生淨土。

起信論疏卷下

七

等也。此中畢竟等。是後二位。

○五勸修利益分。三。初結前生後。二。舉信誘損益。三。結勸修學。

○初結前生後。

已說修行信心分。次說勸修利益分。如是摩訶衍諸佛祕藏。我已總說。

結前大章。牒前大章。

○二舉信謗損益。二。初信受福勝。二。謗毀罪重。

○初信受福勝。二。初約三慧總舉其益。二。別顯三慧益相。

○初約三慧總舉其益。

若有眾生。欲於如來甚深境界。得生正信。遠離誹謗。

入大乘道當持此論。思量修習。究竟能至無上之道。持論聞慧也。思量思慧也。修習修慧也。

○二別顯三慧益相。三。初聞時益。二思時益。三修時益。

○初聞時益。

若人聞是法已。不生怯弱。當知此人。定紹佛種。必爲諸佛之所授記。

○二思時益。

假使有人。能化三千大千世界。滿中眾生。令行十善。不如有人。於一食頃。正思此法。過前功德。不可爲喻。

○三修時益。三。初時少德多。二校量多相。三釋多所以。

起信論疏卷下

蓋

○初時少德多。

復次若人。受持此論。觀察修行。若一日一夜。所有功德。無量無邊。不可得說。

○二校量多相。

假令十方一切諸佛。各於無量無邊阿僧祇劫。歎其功德。亦不能盡。

○三釋多所以。

何以故。謂法性功德。無有盡故。此人功德。亦復如是。無有邊際。

○二謗毀罪重。

其有眾生。於此論中。毀謗不信。所獲罪報。經無量劫。受大苦惱。

一謗成罪重。

是故眾生。但應仰信。不應毀謗。

二誠勸止謗。

以深自害。亦害他人。斷絕一切三寶之種。

三釋罪重意。

以一切如來。皆依此法。得涅槃故。一切菩薩。因之修行。得入佛智故。

四轉釋斷三寶之義。於中二句。一約果人依之得。

起信論疏卷下

蓋

涅槃。二約因人依之得菩提。菩提涅槃。卽是法寶。佛僧可知也。

○三結勸修學。

當知過去菩薩。已依此法。得成淨信。現在菩薩。今依此法。得成淨信。未來菩薩。當依此法。得成淨信。是故眾生。應勤修學。

三世菩薩。同行此法。更無異路。故勸修學。

○三總結迴向。

諸佛甚深廣大義。我今隨順總持說。

結上所說也。於中上句結義。下句結文。

迴此功德如法性普利一切眾生界。

迴向利益也。於中上句明德廣。下句辨退霑。

大乘起信論疏卷下

起信論疏卷下

七


起信論釋教義中詮真妄生滅法相之圖

覽斯圖者。須熟讀論文。深研義理。意旨自得矣。且就生滅一門而觀。若背覺合塵。則翻淨而為染。若斷惑證真。則轉凡而成聖。又兼真如二門而觀。若依真起妄。則法性隨緣。即真如門成生滅門。若會緣入實。則無明體空。即生滅門成真如門。復加圓融統觀。染淨妄真。總不離法界藏心矣。如此流變三疊順逆觀之。或迷或悟。或佛或生。顧在當人用心何如耳。豈有一定法哉。發趣道相者。宜慎思之。

慈雲灌頂行者續法題

起信論疏卷下

夫





无

光緒二年冬十一月石埭楊文會識於湘東精舍

起信論疏科文提要

前懸敘義門 六初教起因緣至 六所詮宗趣

△初教起因緣 有十徵因一智二法三示四顯五本六力七義八緣九起十益

△二諸藏所攝 三藏

△三教義分齊 二一約教詮法通局教有五一小乘

教二大乘始教三終教四頓教五圓教 二約法

生起本末有五重初唯一心 華嚴 二依心開二

門一真如門 頓教詮此始教 二生滅門 終 三依

生滅門明二義一覺二不覺 四依不覺生三細

一業相 始教相 二轉相三現相 五依現相生六

起信論疏卷下 科文

粗一智相二相續相三執取相 小乘 四計名字相

五起業相 齊此 六受報相 又略為八重 初一心

業三見四境界五分別相續六取著計名七造業八受報

△四教所被機 三聚眾生一正定

△五能詮教體四門一隨相二唯識三歸性四無礙

△六所詮宗趣總有五宗一隨相法執宗 小 二真空

無相宗 始教 三唯識法相宗 始教 四如來藏緣起宗

終教 五圓融具德宗 圓 別有五對一教義二理

事三境行四證信五因果

初解名題三一論題二論主三譯人

文

首歸敬三寶述造論意

行標列五分 初因緣分至 五勸修利益分

初因緣分 八 一總相下七別益 分問答因機製論

次立義分 二一法二義 法二一真如相二生滅因

緣相 義二一大義 體相 二乘義 果

三解釋分 三一顯示正義二對治邪執三分別發趣

道相

三顯示正義 二一心真如門二心生滅門

△真如門 二一離言顯體 文斷疑問答得入 二依言

辨德 二一依言辨德二一空二不空

起信論疏卷下 科文

△生滅門 二一明法二示義 法二一染淨生滅二

染淨相資 染淨生滅 三 一生滅心識二生滅因

緣三分別生滅相

△生滅心識 二一覺二不覺 覺義二一本覺二始

覺 始覺 四 一名字覺 滅 二相似覺 異 三隨分覺

住 四究竟覺 生 後文引經釋成無念結同本覺

本覺 二一隨染二性淨 隨染本覺 二 一智淨相

二不思議業相 性淨本覺 四 一如實空鏡二因

熏習鏡三法出離鏡四緣熏習鏡 不覺義 二一

根本 無明住地 二枝末 枝末不覺 二一無明為

依本覺起

因生三細二境界為緣生六麤三細六麤見前懸敘結歸無

明合上覺不覺辨同異二異相

△生滅因緣三一心有依梨耶二意三現四智五相續

結歸唯心三意識六塵後文重顯所依緣體三一

不變無念二緣起明無三染心 染心六一執染二乘

二不斷染初地三賢三分別智染二地七地四現色染八地五

能見心染九地六根本業染如十地入後文更重料揀

分三一約無明治斷二釋相應不相應義三煩惱礙智礙義

△分別生滅相二一分別麤細二順論生逆論滅

後文問答釋疑體相有滅非滅

起信論疏卷下 科文

三

△染淨相資總有四法一淨法真如二染因無明三妄心

業識四妄境六塵別明熏習二一染二淨 染熏三

一妄境熏妄心念取二妄心熏無明事識三無明熏

真如根本見愛淨熏二一妄心熏真如意事二真如熏

無明體相用二真如自體相熏後文問答釋染淨差

別因緣義 真如用熏二一差別緣二平等緣

合體用熏義二一未相應三賢二已相應入地

合染淨熏義二一染法無始二淨法無終

△生滅門所示義三一體二相問答重辨三用 用

大二一因二果 因三一行二願三悲智方便

果二一應身二報身後文問答除疑現色

△科後會相入實從生滅門入真如門

二對治邪執二一人執二法執 人執五一執空為

法二執法是空三執性有色四執性有染五執染

有始淨有終 法執二乘後科究竟離妄執義

三分別發趣道相三 一信成就發心二解行發心三

證發心 信成發心三 一明信位二發心有三心

二深心問答重顯方便有四一行根本二能止三

利益 解行發心二 一明行位二修六度 證發

心三 一體地位證境二相有三心一真心三成滿

起信論疏卷下 科文

四

後文問答除疑二一種智疑二業用疑

四修行信心分二 一信心二修行 信心四一真如

二佛三法四僧 修行五一施二戒三忍四進後文

別明除障方便五止觀五止觀三一止二觀三

俱 止五一修方便二顯勝能三辨魔事四簡真

偽五示利益有十觀四一法相觀三無我四不淨

二大悲觀三大願觀四精進觀合止觀俱

△分別明念佛方便

五勸修利益分二 一信受福勝二謗毀罪重 結勸

偈末總結迴向

起信論疏法數別錄

一心 一音 一乘 一法界

按經典言一處極多此論疏中亦不止此四一今略依信解行證四位錄此以見大槩

大乘二種 一法二義 二門 一真如 二生滅

心識二義 一覺二不覺 二法 一出世 二世間

二覺 一本覺 二始覺 二不覺 一根本 二枝末

二位 一果 二因 二如來藏 一空 二不空

佛二身 一智身 二法身 二報 一正報 二依報

二德 一智德 二斷德 真如二義 一不變 二隨緣

二智 一根本 二後得 無明二義 一體空 二成事

起信論疏卷下 法數

五

二生死 一分段 二變易 二涅槃 一有餘 二無餘

二行 一自利 二利他 二諦 一世諦 二第一義諦

二障 一業障 二報障 楞伽二識 一藏識 二轉識

二礙 一煩惱礙 二智礙 二藏 一聲聞藏 二菩薩藏

二邪見 一斷見 二常見 二執 一人我見 二法我見

二觀 一方便觀 二正觀 二乘 一聲聞 二緣覺

本覺二相 一智淨相 二不思議業相

二觀 一奢摩他觀 止 二毗鉢舍那觀 觀

外熏二緣 一差別緣 二平等緣 又二緣 一遠緣 二

近緣 又二緣 一增行緣 二受道緣

三寶 一佛 二法 三僧 三業 一身 二語 三意

三大 一體 二相 三用 三藏 一經 二律 三論

三慧 一聞 二思 三修 三分 一序 二正說 三流通

三受 一苦 二樂 三捨 三立量 一宗 二因 三譬喻

三毒 一貪 二瞋 三癡 三界 一欲 二色 三無色界

佛三身 一法身 二報身 三應身

楞伽三識 一真識 二現識 三分別事識

三聚眾生 一正定聚 二邪定聚 三不定聚

三世間 一器世間 二眾生世間 三智正覺世間

三慈悲 一生緣慈 二法緣慈 三無緣慈

起信論疏卷下 法數

六

三性 一依他起性 二徧計執性 三圓成實性

唯識三分 一自體分 二見分 三相分

三細 一無明業相 二轉相 三現相 即前三分

三世 一過去 二現在 三未來

三種發心 一信成就發心 二解行發心 三證發心

三德 一法身 二般若 三解脫

三迴向 一迴事向理 二迴因向果 三迴自向他 又

云初向實際次向菩提後向眾生

三苦 一苦苦 二壞苦 三行苦

信發三心 一直心 二深心 三大悲心

證發三心一真心二方便心三業識心

三施一財施二無畏施三法施

三聚戒一攝律儀戒二攝善法戒三攝眾生戒

三精進一勤勇精進二難壞精進三無足精進

四相一生二住三異四滅

四法寶一教二理三行四果

熏習四法一淨法真如二染因無明三妄心業識

識四妄境六塵

四教體一名二句三文四音聲前三為假後一為實

四句有句二無句三非有無四有無俱一異四句准此

起信論疏卷下法數

七

四德一常二樂三我四淨

始覺四位一名字覺二相似覺三隨分覺四究竟覺

四攝法一布施二愛語三利行四同事

四無量心一慈二悲三喜四捨

四無礙色一大小無礙二互用無礙三事理無礙四

應機無礙

華嚴四重法界一事法界二理法界三事理無礙法

界四事事無礙法界

四鏡一如實空鏡二因熏習鏡三法出離鏡四緣熏

習鏡

四大一地二水三火四風

大願四心一廣大心二第一心三常心四不顛倒心

四智一大圓鏡智二平等性智三妙觀察智四成所

作智

四信心一真如二佛法三僧

四威儀一行二住三坐四臥

四忍一耐怨害忍二安受苦忍三諦察法忍四無生

法忍

法相四觀一無常二苦三無我四不淨

五重生起初一心二二門三二義四三細五六麤

起信論疏卷下法數

八

五教一小乘教二大乘始教三終教四頓教五圓教

五宗一隨相法執宗二唯識法相宗三真宗無相宗

四如來藏緣起宗五圓融具德宗

五住煩惱一見惑見一切處住地二欲界思惑三

色界思惑四無色界思惑上三皆名愛住地五

塵沙惑無明惑合為一住名無明住地

五蘊一色二受三想四行五識

五意一業識二轉識三現識四智識五相續識

染淨熏習五法一妄境熏妄心二妄心熏無明三無

明熏真如上三四妄心熏真如五真如熏無明

淨熏

五門一施二戒三忍四進五止觀

眾生五性一凡夫二小乘三菩薩四不定五外道

六根一眼二耳三鼻四舌五身六意六識依此

六塵一色二聲三香四味五觸六法

六麤一智相二相續相三執取相四計名字相五起

業相六受報相

六染一執染二不斷染三分別智染上三皆四現

色染五能見心染六根本業上三皆不

六通一天眼二天耳三他心四宿命五神境六漏盡

起信論疏卷下 法數

九

六度一檀波羅蜜二尸波羅蜜三羼提波羅蜜四毗

黎耶波羅蜜五禪波羅蜜六般若波羅蜜

性德六義一大智慧光明義二徧照法界義三真實

了知義四自性清淨義五常樂我淨義六清涼不

變自在義

七種大性一境二行三智四精進五方便善巧六證

得七業疏引雜集論

八重生起初一心二無明業相三能見相四境界相

五分別相續六取著計名七造業八受報

八識一眼識二耳識三鼻識四舌識五身識六意識

七末那識八阿賴耶識一云阿黎耶

八相成道一從兜率天下二入胎三住胎四出胎五

出家六成正覺七轉法輪八般涅槃

八風一利二衰三毀四譽五稱六譏七苦八樂

九相妄心三細六麤已見前

十法界一佛二菩薩三緣覺四聲聞五天六人七阿

脩羅八畜生九餓鬼十地獄

十不善一殺二盜三婬四兩舌五惡口六妄言七綺

語八貪九瞋十邪見一二三身業四五六七口業

十一切處一青二黃三赤四白五地六水七火八風

起信論疏卷下 法數

十

九空十識

十信一信心二念心三精進心四慧心五定心六不

退心七護法心八迴向心九戒心十願心楞嚴經

華嚴有十信品未列名目本論疏中於十信位略

分三品一日十信終心即信滿位也二日十信住

心即正信位也三曰信位初心即初信也

十住一發心住二治地住三修行住四生貴住五方

便具足住六正心住七不退住八童真住九法王

子住十灌頂住

十行一歡喜行二饒益行三無違逆行四無屈撓行

五無癡亂行六善現行七無著行八難得行九善

法行十眞實行

十迴向一救護一切眾生離眾生相迴向二不壞迴

向三等一切諸佛迴向四至一切處迴向五無盡

功德藏迴向六入一切平等善根迴向七等隨順

一切眾生迴向八眞如相迴向九無著無縛解脫

迴向十入法界無量迴向

十地一歡喜地二離垢地三發光地四燄慧地五難

勝地六現前地七遠行地八不動地九善慧地十

法雲地按十地名目各經微有不同此依華嚴經

日無相入地曰色自在地曰淨心二地曰具戒七地

起信論疏卷下 法數

主

十地凡四十位皆準華嚴加以等覺爲四十一位

皆因位也唯妙覺爲果位楞嚴疏云諸經論建立

地位多少不同仁王五十一位楞嚴五十二位華

嚴四十一位大品般若四十二位楞嚴五十七位

又云六十聖說不同或開或合華嚴并因果爲

四十二位應字母之數不數十信以信未入位故

論文十二喻一風水動溼喻淨本覺智二淨鏡四喻

性淨本覺三迷方喻一心四瓦器微塵喻同異相五明

鏡像兩喻二喻妄染無體六風依水動喻心生相

七衣服熏香喻熏習八木中取火喻淨法九迷東

爲西喻眾生不能見佛法身十摩尼寶磨治喻發信心十一鏡有垢

喻見佛法身十二夢電雲三喻止觀門觀過去

華嚴四十二位見前十住十行十迴向十地等覺妙覺已

百法明門略有一心法八二心所有法五十三色法

一四心不相應行法四五無爲法六

第一心法八即眼耳鼻舌身意末那黎耶八識也

第二心所有法五十一六爲一徧行五一作意二

觸三受四想五思二別境五一欲二勝解三念

四三摩地五慧三善十一一信二精進三慚四

愧五無貪六無瞋七無癡八輕安九不放逸十行

捨十一不害四煩惱六一貪二瞋三慢四無明五

疑六不正見此六法爲五隨煩惱二十一念二

恨三惱四覆五誑六諂七憍八害九嫉十慳十一無

起信論疏卷下 法數

主

慚十二無愧十三不信十四懈怠十五放逸十六昏沈十七掉舉

八失念九不正知十散亂自一至十十一法爲小隨

中隨煩惱十三以後六不定四一睡眠二惡作

三尋四伺

第三色法十一一眼二耳三鼻四舌五身六色七

聲八香九味十觸十一法處所攝色

第四心不相應行法二十四一得二命根三眾同

分四異生性五無想定六滅盡定七無想報八名

身九句身十文身十一生十二住十三老十四無常十五流轉

十六定十七相應十八勢速十九次第二十時二十方二十

數三十和合性^四二十不和合性

第五無爲法^一六虛空無爲^二擇滅無爲^三非擇滅無爲^四不動滅無爲^五想受滅無爲^六眞如無爲

右依百法明門論唯識一宗名相繁多慈氏菩薩所說瑜伽師地論有六百六十法天親菩薩約之爲百法卽此百法明門也起信論雖專詮性宗然亦兼唯識法相蓋相非性不融性非相不顯故特錄百法於篇末庶易檢尋焉

起信論疏卷下

法數

三

龍城曾氏施資敬刊

光緒三年春正月長沙刻經處識

願以此功德
莊嚴佛淨土
上報四重恩
下濟三途苦
若有見聞者
悉發菩提心
盡此一報身
同生極樂國

大乘起信論疏

唐西京太原寺沙門法藏造疏

蓮因寺大專學生齋戒學會恭印

南投縣水里鄉頂崁村圳頭巷十五號

倡印者：蓮音學苑

承印者：慧霖文化有限公司

中和市中山路二段三二七巷十五號五樓

電話：（〇二）二二四五—〇三一八

